

Ebreusi

Ebreusi norĩ ma, rob'ui'éré

Ībaihâ wasu'uzé

Ā ĩbaihâ na rob'ui'éré hã zudezu norĩ ma hã, Zezusihi zazei'wa norĩ ma hã. Ebreusi hã zudezu norĩ waptêrêzé hãiba amo. Ā ĩbaihâ na rob'ui'éré'wa hã ni'wa hã te te waihu'u ô di.

Zudezu norĩ hã Zezusihi zazei'wa norĩ hã ma tô te te 're robzépata za'êtê za'ra, ĩsiré zudezu norĩ hã te te siwi 're wê'ô za'ra mono wa, 'Re ĩhâimana u'âsi mono nhimiroti 'rata na rob'ui'éré hã te te oto 're 'madâ'â za'ra mono ô newa. Taha wa, ma tô Ebreusi na rob'ui'éré'wa hã ĩsazei'wa norĩ âma tihâtâ'â za'ra, zudezu norĩ nhimizaze 'rata zéb u apâ sipizari za'ra o'umnhasite. Ma tô duré dama waihu'u za'ra, Zezusi hã 'Re ĩhâimana u'âsi mono 'ra uptabi na hã. Ta hã hãiwa âma romhuri'wa norĩ ma, pire uptabi di, ti'ai âma uburé 'Re ĩhâimana u'âsi mono ma romhuri'wa norĩ ma zama, Mozésihi ma, duré Zuzuwéhé ma.

Ma tô duré dama waihu'u za'ra, âne: Zezusi hã dazada ĩsômrisé hã danhipai u wê uptabi di, 'Re ĩhâimana u'âsi mono ma, danhimizama hã dasi'udâna da te tâma 're ĩsômri za'ra mono na hã.

Capituru 11 âma hã ma tô duré wama sisi nhoré za'ra, ni'wam norĩ hã 'Re ĩhâimana u'âsi mono si te te sina 're ĩumnhasi za'ra mono zém na hã, te te 're robzépata za'ra mono nherê.

'Re ĩhâimana u'âsi mono 'ra wasu'u

1 ¹ Duréihã 'Re ĩhâimana u'âsi mono hã ma tô tizadawa wasu'u 'rata 'wa norĩ ma te te 're rowasu'u, ta norĩ hã te te oto wahi'rata norĩ ma âma 're rowasu'u za'ra mono da, ĩsadawa nhipai u hã. Ta norĩ ma, ma tô marĩ na misi si te te tâma 're rowasu'u za'ra, âma ĩpu'u na hã, 'Re ĩhâimana u'âsi mono te te tâma 're ĩwaihu'u za'ra mono zép sidâpâsi. ² Tane nherê, ti'ra si ma tô oto pisutu, ĩsadawa nhipai u te te oto wama âma 're ĩrowasu'u za'ra mono zéb da hã, rob'râsutuzéb u romhutu na za 're ĩwahâimana za'ra mono norĩ ma. Taha si ma tô Timama zadawa para uburé te te ro'apoto. Taha si ma tô duré pisutu ĩmama hã, niwapsi uburé roptede'wa na 're hâimana mono da oto. ³ Ôhõ si te oto Timama hã ĩwê uptabi na te te dama 're wasu'u, rowa'a ĩsa'êtê na hã. Taha si te Timama ne 're hâimana, aiwa wa. Tinhimiroti nhiptete na te uburé marĩ hã te te 're a'upari wê, 're si'utõrĩ tõ za'ra mono da. Ôhõ si dawasédé hã te te dama 're apari mono da, dazada dâ'â wa, taha pari hãiwa'utu wa, te

oto 'Re ìhâimana u'âsi mono nhimire niwĩ 're sãmra, hâiwa ãma. Danhipai u ìwaihu'u pese uptabi nhimire niwĩ te oto 're sãmra, ìsiré te te 're da'ab'madâ'â mono da oto, pire uptabi na.

**ZeZusi hã hâiwa ãma romhuri'wa norĩ ma,
pire na 're ìhâimana mono zé wasu'u**

4 Ìmama hã ma tô ìsisi hã tãma tisõ, sisi pire da, 'Re ìhâimana u'âsi mono 'ra na ìsisi da hã, uburé hâiwa ãma tãma ìromhuri'wa norĩ nhisi ma, pire uptabi da. Tane ma duré Ìmama hã pisutu, hâiwa ãma romhuri'wa norĩ ma, pire uptabi na 're hâimana mono da oto, ì'ra hã. 5 Duréihã 'Re ìhâimana u'âsi mono zadawa wasu'u'wa hã ma tô ãne na ãma rob'ui'ééré, 'Re ìhâimana u'âsi mono mreme na:

“A hã ì'ra te ìme 're aihâimana mo. Taha wa, wa za oto ì'ra na te 're asisi, dama aipire na 're aihâimana mono da oto.”

Ãne duré ìhâiba amo na rob'ui'ééré hã:

“Wa hã Ìmama wa za tãma 're ìhâimana. Taha wa, ì'ra te za 're hâimana.”

Ãne duréihã 'Re ìhâimana u'âsi mono mreme na rob'ui'ééré hã. Tawamhã e hâiwa ãma tãma ìromhuri'wa norĩ ãma zama, ma tô ãne na hã rowasu'u, 'Re ìhâimana u'âsi mono hã. Mare di. ZeZusihi ãma si, ma tô ãne na hã rowasu'u.

6 Ãne ma tô duré ni'wa hã ãma rob'ui'ééré, 'Re ìhâimana u'âsi mono mreme na, ti'ra hã ti'ai u za te te we ìsatõrízém na, da'ra hã dama 're ìpoto 'rata za'ra mono ne ìpire uptabi na hã:

“Uburé hâiwa ãma ìma romhuri'wa norĩ hã te za ãma tiwata za'ra.”

Ãne ma tô ZeZusihi ãma rowasu'u siro, 'Re ìhâimana u'âsi mono hã.

7 Ãne na si ma tô hâiwa ãma romhuri'wa norĩ ãma hã rob'ui'ééré za'ra, ni'wa hã:

“Re ìhâimana u'âsi mono hã ma tô hâiwa ãma tãma ìromhuri'wa norĩ hã pisutu za'ra, rowa'u'u ne 're hâimana za'ra mono da, duré unhama ro'o ne 're hâimana za'ra mono da.”

Ãne na si ma tô ìwasu'u za'ra na ni'wa hã rob'ui'ééré.

8 Tazahã, ì'ra si dama pire uptabi na 're ìhâimana mono zém na ma tô rowasu'u 'Re ìhâimana u'âsi mono hã, ãne:

“A hã Ropoto'wa. Da'ãma 're asib'a'uwẽ mono zé hã aiwi 're si'utõrĩ mono õ di za. Te za tô aima 're hâimana u'âsi. Duré marĩ na 're upai mono ãna, te za 're ìda'ab'madâ'â u'âsi mo.

9 Uburé marĩ ìwẽ hã da te 're ìmanharĩ za'ra mono si, aima wẽ uptabi di. Duré uburé marĩ ìwasédé hã da te 're ìmanharĩ za'ra mono si, ma tô da'ãma 're ì'a'ruiwapari mo.

Taha wa, wa hã 'Re ìhâimana u'âsi mono, Asib'apito hã wa tô aipisutu, uburé asiré 're ìhâimana za'ra mono norî nhipai u, aipire na tâma 're aihâimana za'ra mono da, duré âne zarina âma 're atoi u'âsi mono da.”

Ãne ma tô 'Re ìhâimana u'âsi mono hã ti'ra ma roti.

10 Ãne ma tô duré ti'ra ma tinha, 'Re ìhâimana u'âsi mono hã: “A hã uburé Danhib'apito. Duréihã ropoto na'rata hawimhã ma tô ti'a hã ì'manha. Asi'uihã na ma tô duré hãiwa hã ì'manha.

11-12 Tane nherê, te za niwamhã ai'utõrî zahuré, sahuré ta norî hã, da'uza hã dawî 're ìhâsiwamnarî su'u za'ra mono ne. Duré da'uza pano pa hã dawî 're hâsiwamnarî za'ra mono wa, rob u da te oto 're sãmra mono da, da te 're ìhâninha za'ra mono ne, te za ta norî hã ì'uprozi zahuré, ìtép si 'manharî zahuré da, ìsõwa're're. Da'uza 'rada hã da te oto dasiwi 're wê'õ za'ra mono wa, ìhâtép si da te âma 're ìsaprî za'ra mono ne, te za tô ìtép si ì'manharî zahuré, ti'a hã, hãiwa me.

Tane nherê, niwamhã ai'utõrî õ di za, a hã. Aiwétési te za 're aihâimana u'âsi mo. Nimahã na hã âma saprî waihu'u õ di za, aihâimanazém na hã. Tô õhõ si, 're aihâimana mono zé hã za.”

Ãne ma tô 'Re ìhâimana u'âsi mono hã ti'ra ma, waihu'u siro.

13 Ãne ma tô duré 'Re ìhâimana u'âsi mono hã tâma waihu'u siro: “Ì'rata te za 're asãmra u'âsi mo ìnhimire niwî, dama aipire na ìsiré 're aihâimana u'âsi mono da. Asitob'ru norî nhiptetéze hã wa za tiwi uprozi za'ra, wapu na aima 're hâimana za'ra mono da oto, duré aima sib'uware na 're hâimana za'ra mono da oto.”

Tawamhã, e hãiwa âma tâma ìromhuri'wa norî ma, ma tô âne hã waihu'u za'ra, 'Re ìhâimana u'âsi mono hã. Mare di. Ti'ra ma si, ma tô âne hã waihu'u siro, ta norî ma, pire u'âsi 're hâimana mono wa za, Zezusi hã.

14 E niha tawamhã, hãiwa âma romhuri'wa norî 're ìhâimana za'ra mono zé hã. Ta norî hã ìhâiba'õ, 'Re ìhâimana u'âsi mono ma, romhuri'wa norî. Ta norî si ma tô 'Re ìhâimana u'âsi mono hã te te 're satõrî za'ra ti'ai u, za te te ìsõ'reptu za'ra norî hã te te 're pawaptob za'ra mono da, ti'ab ré. Taha na si, ta norî nhimiromhurizé hã.

Danho'reptuzé ìwê uptabi wasu'u

2¹ Taha wa, Cristuhu wasu'uwê hã wa te 're ìwapari za'ra mono zép si, wa za wa te 're 'madââ pese za'ra, wasina 're wapahã za'ra mono tã da, tiwi. ² Duréihã 'Re ìhâimana u'âsi mono nhimiroti

hã, hâiwa âma tâma ïromhuri'wa norĩ hã wahi'rata norĩ ma, te te ïwaihu'u za'ra zé hã tô sena na 're ïhâimana mono na ma tô da te 're waihu'u za'ra. Duré ni'wam norĩ hã ôhõ si te te 're 'madâ'â za'ra mono õ wa, duré ïsarina si 're nomro wê mono õ wa, ma tô 'Re ïhâimana u'âsi mono hã ïsarina te te 're hã za'ra. ³ ãne wa, te te 're ïwa'anho'reptui mono zéb zô, ïwê uptabi zô, wa te sô 're rob'ruiwapari za'ra mono õ nherê, e ïsimihâzé wi, wa za wasi'uihã na 're wawairébé. 'Re ïhâimana u'âsi mono te te 're ïwa'anho'reptui mono zé wasu'u na ma tô Wanhib'apito hã dama rowasu'u 'rata, si'uihã na. ïmreme wapari'wa norĩ hã ma tô duré ãne na wama âma rowasu'u za'ra, tô sena danho'reptuzém na wa te ãma 're ïsaze za'ra mono zéb da hã. ⁴ 'Re ïhâimana u'âsi mono zama, ma tô te te 're wa'apawapto, te te 're ïda'anho'reptui mono zé wasu'u hã, tô sena na 're ïhâimana mono na wa te wasina âma 're waihu'u pese za'ra mono da oto. Tiwaihu'u pese na marĩ ïwê hã dama ï'manharĩ waihu'u'õ hã ma tô te te dama 're ab'manharĩ wê, âma 're ïdatob'uzu za'ra mono zé hã, taha zarina tô sena, wa te ãma 're ïwaihu'u pese za'ra mono zéb da hã, te te 're ïda'anho'reptui mono zé wasu'u hã. Ma tô duré Tipê'ezani ma pisutu, romhuri hã ïsazei'wai mono bâ te te sima 're ï'awê mono zéb zarina, te te tâma 're apisutu mono da, âma 're ïsipawaptob za'ra mono zéb da hã. Taha zarina, wasi'uihã na tô sena, wa te ãma 're waihu'u pese za'ra mono da, ma tô duré te te 're wa'apawapto, 'Re ïhâimana u'âsi mono hã.

Zezu Cristu hã Danho'reptui'wai wasu'u

⁵ Za 're ïdahâimana téb za'ra mono na, wa tô aima âma rowasu'u pari za'ra wa'wa. E taha wa, te za hâiwa âma tâma ïromhuri'wa norĩ hã pisutu za'ra 'Re ïhâimana u'âsi mono hã, ta norĩ hã pire na te te 're da'madâ'â za'ra mono da, za 're ïdahâimana téb za'ra mono âma hã. Mare di. Ta norĩ hã danhib'apito da, te te pisutu za'ra õ di. ⁶ Tazahã duréihã ni'wa hã ma tô ãne na ïbaihã na âma rob'ui'éré, 'Re ïhâimana u'âsi mono ma, te te ïrowasu'uzém na hã:

“Re ïhâimana u'âsi mono, e dahâimana pire na aima 're dahâimana za'ra mono bâ, te da'ãma 're aipo're pu'u u'âsi mo. E niha da, te bété da'ãma 're aiwamri u'âsi mo, a'uwê na si 're dahâimana za'ra mono nherê.

⁷ Ma tô aré dama ïpisu, hâiwa âma aima romhuri'wa norĩ zapari, dawapu na 're dahâimana za'ra mono da a'â.

Tazahã, ma tô oto dama ïpisu, dapire na oto 're dahâimana za'ra mono da, ïwê na si.

⁸ Ma tô duré dama ïpisu oto, uburé marĩ hã niwapsi da te 're 'madâ'â za'ra mono da, dapire na.”

ãne na ma tô duréihã dawasu'u na rob'ui'éré, ni'wa hã.

'Re ìhâimana u'âsi mono hã ma tô oto dama pisutu, niwapsi uburé marĩ hã da te 're ì'madâ'â za'ra mono zéb da hã, dapire na. Marĩ hã taré 're 'mai'hâimana mono õ di za, da te 're ì'madâ'â za'ra mono õ na hã. Tane nherê, zahadu uburé marĩ hã da te 're 'madâ'â za'ra mono õ di, ti'a 're dahâimana za'ra mono ré hã. ⁹ZeZusi 're ìmorizép si wa tô wa te 're waihu'u pese za'ra. Ta hã ma tô 'Re ìhâimana u'âsi mono hã pisutu, ti'ai âma 're hâimana mono ré hã, hâiwa âma tâma ìromhuri'wa norĩ ma, wapu na a'â 're hâimana mono da, dasine. ZeZusi hã dazada dâ'â da si, ma tô pisutu 'Re ìhâimana u'âsi mono hã, da'âma 're pẽ'êzé mono wa, da'âma 're ìsiwãrĩ mono zéb da hã. Ma tô duré pisutu ti'ra hã, pire na dama 're hâimana u'âsi mono da oto, dazada ìdâ'â zarina, te te ìrobzépata na te te sina tâma uwaimrami wa, Timama ma hã. ¹⁰'Re ìhâimana u'âsi mono hã ma tô uburé te te ro'apoto. Taha ma si te uburé marĩ hã tâma 're hâimana. Ta hã tô ìbâ, ma ti'ra hã pisutu ZeZusi hã, dazada dâ'â wa, te te robzépata da a'â, taha zarina te te 're da'anho'reptui mono da, te te sina uwaimrami da, 'Re ìhâimana u'âsi mono te te tâma ìpisutuzéb zarina. Da'ahâ na hâiwa âma rowẽ uptabi na ì'rata 're danomro u'âsi mono da, ma tô âne da hã tâma pisutu, 'Re ìhâimana u'âsi mono hã.

¹¹ZeZusi hã Timama nhib'a'uwẽ norĩ pisutu'wa, duré ìsib'a'uwẽ da, ZeZusi te te 're ìpisutu za'ra mono norĩ hã misire Ìmama za'ra hã tô õhõ si. Taha wa, ZeZusi hã âma 're sisé mono õ di, ta norĩ hã tisisânawã na za te te 're ì'anhisi mono da hã, 'Re ìhâimana u'âsi mono hã misire Ìmama za'ra wa, simisutu. Te za tô tisisânawã na te te 're anhisi, ZeZusi hã. ¹²Durêihã 'Re ìhâimana u'âsi mono zadawa wasu'u'wa hã ma tô âne na âma rob'ui'éré, ZeZusi hã Timama ma, za te te tâma ìrowasu'uzém na hã:

“Ìsisânawã norĩ ma, wa za te tâma 're aiwasu'u wẽ za'ra.

Siré 're si'rã'õtõ mono ré, wa za ai'âma 're ìwata u'âsi, ìsõ'a za'ra.”

¹³Ma tô duré ni'wa hã âne na âma rob'ui'éré, ZeZusihi mreme wasu'u na hã:

“Ìzama wa za te ìsina 're umnhasi pese u'âsi, 'Re ìhâimana u'âsi mono hã.”

Durêihã âne, ZeZusihi mreme wasu'u amo na da te âma ìrob'ui'érézê hã, ìsazei'wa norĩ âma hã:

“Âhãta wa hã wa oto 're ìhâimana, 'Re ìhâimana u'âsi mono 'ra na oto tâma 're ìhâimana za'ra mono norĩ siré, õ hã te te ìma 're ì'apisutu mono norĩ siré.”

Âne durêihã ZeZusihi mreme wasu'u na rob'ui'éré hã.

¹⁴'Re ìhâimana u'âsi mono 'ra ne, tâma 're ìhâimana za'ra mono norĩ hã te a'uwẽ hâiba na 're hâimana za'ra, nhi ré, duré wapruí ré.

Taha wa, ma tô Zezusi hã dasiré si'a'uwě, a'uwě hâiba na a'â 're morĩ da. Tidâ'ázém na Wa'uburé nhiptede hã te te tiwi prub da, ma tô a'uwě hâiba na podó, Wa'uburé nhimiromhuri ma, dadâ'ázé ma, marĩ zô dasipibuma 're danhopré tō mono da oto. **15** Ni'wam norĩ hã te tô Wa'uburé nhimiromhuri zarina, pahi u'âsi 're hâimana za'ra, tidâ'ázé ma hã, ĩwada'uri zarina si pawa'âbâ âna te te dama 're ĩromhuri za'ra mono hã tinhib'apito nhimiwada'uri na si sina hâtâ'â u'âsi 're ĩhâimana za'ra mono ne. Ta norĩ hã tidâ'ázé ma, pahi âna oto 're hâimana za'ra mono da, ma tô sada tidâ'â za'ra, Zezusi hã. **16** E hâiwa âma romhuri'wa norĩ hã te te 're pawaptob za'ra mono da, ma tô we ti'ai u mo Zezusi hã, dawazari si'a'uwě da. Mare di. Abra'âhã nhihudu mono bâ te te 're ĩpawaptob za'ra mono da si, ma tô wei mo. Âne hã wama waihu'u pese za'ra di oto, wa norĩ hã. **17** Taha wa, tisisânawã norĩ me, aiwa uptabi a'â 're hâimana mono da, ma tô si'a'uwě Zezusi hã, 'Re ĩhâimana u'âsi mono ma, da'âma romhuri'wa ĩpire uptabi ne 're hâimana mono da, sasedoti ĩpire uptabi ne, tãma umnhasi na te te tãma 're romhuri mono da, da'âma pẽ'ézé uptabi sina. Taha da, ma tô si'a'uwě tô, taha zarina dawasédé hã te te oto dama 're apari mono da. Ta hã dasiré si'a'uwě ô 'wa'âhã, âne hã te te aré sina uwaimrami waihu'u ô di, 'Re ĩhâimana u'âsi mono ma hã. **18** Zezusi hã ma tô robzépata za'ětê tô, ti'ab ré. Duré Wa'uburé hã ma tô aré pibu, tiwasédé hã te te 'manharĩ da. Tane nherẽ, te te ĩwapari ô zarina, tiwasédé hã te te 'manharĩ ô di. Taha wa, Wa'uburé hã te te oto 're wapibu za'ra mono wamhã, tô ô hã te za te te 're wa'apawapto, ĩsine wawasédé hã wa te 're 'manharĩ za'ra mono âna, wanhiptete sina ôhõ âma si 're wanomro mono da, Zezusi hã si.

Mozésihi wasu'u, Cristuhu wasu'u me

3 **1** ĩsisânawã norĩ, a norĩ wa'aba zama ma tô 'Re ĩhâimana u'âsi mono hã aipisutu za'ra wa'wa, ĩsib'a'uwě si oto 're anomro aba mono da, hâiwa âma ĩ'rata 're aihâimana u'âsi za'ra wa'aba mono da. Taha wa, te za Zezusi hã si 're ĩrosa'rata u'âsi za'ra wa'aba mo, 'Re ĩhâimana u'âsi mono hã ti'ai u, we te te ĩsatõrĩ na, duré dama ĩsada'wa wasu'u'wa na. Ta hã sasedoti ĩpire uptabi na te wa'âma te te 're romhuri u'âsi, ĩwasu'uwě na wa te 're ĩsaze za'ra mono zém na te te 're wa'apawapto mono da. **2** Ta hã ma tô 'Re ĩhâimana u'âsi mono ma, umnhasi sina te te tãma 're romhuri wě u'âsi, te te tãma 're ĩ'apisutu mono zéb zarina si. Tane aiwa, duréihã Mozési hã ma tô 'Re ĩhâimana u'âsi mono nhib'a'uwě norĩ ma, umnhasi sina te te tãma 're romhuri wě u'âsi za'ra. **3** Ni'wa hã simiromhuri wě na te te sima 'ri wamhã, te za âma tatob'uzu za'ra ni, ĩsimiromhuri wě na hã. E tawamhã 'ri na si te za âma tatob'uzu

za'ra ni. Mare di. Taha nhipai u, te za 'ri 'manharĩ'wai ãma zama tatob'uzu za'ra ni. Tane duré, Mozési hã dama pire na 're hâimana mono nherê, taha hâimanazém nhipai u hã, Zezusihi si dama pire uptabi di. ⁴ Ti'ai ãma uburé 'ri hã danhib'rata na rob'manharĩ hã si'uihã na 're si'manharĩ za'ra mono õ di. Taha wa, te 'ri'wa norĩ hã 'ri nhipai u, pire na 're hâimana za'ra. Tane nherê, 'Re ãhâimana u'âsi mono si ma tô uburé marĩ hã te te 're ab'manharĩ. Taha wa, te uburé marĩ nhipai u, pire uptabi na 're hâimana u'âsi ta hã siwaprosi. ⁵ Mozési hã ma tô 'Re ãhâimana u'âsi mono ma, umnhasi sina te te tãma 're romhuri wê u'âsi, ãsib'a'uwê te te tãma 're ãpawaptob za'ra mono zém na hã. Marĩ na 'Re ãhâimana u'âsi mono hã za ti'ab ré te te dama 're ã'arowaihu'u mono zém na, ma tô ãsib'a'uwê ma te te 're rowaihu'u sirõmo za'ra, Mozési hã. 'Re ãhâimana u'âsi mono ma, romhuri'wa na si, te ta hã 're hâimana. ⁶ Tane nherê, te Cristuhu si tãma umnhasi na uburé ãsib'a'uwê norĩ hã te te tãma 're 'madã'ã pese za'ra, pire uptabi na, 'Re ãhâimana u'âsi mono 'ra hã. Wa norĩ hã Cristuhu ãma si 're wanomro mono wa, da te wama 're rob'manharĩ wasété za'ra mono nherê, wapahi ãna wanhiptete sina ãma 're wanomro mono wamhã, wa za tô ãsib'a'uwê na tãma 're wahâimana u'âsi za'ra. 'Re ãhâimana u'âsi mono hã ãwê si, za te te wama ãpisutu za'ra zéb zô, wama umnhasi sina sô 're ãwanhimipari u'âsi za'ra mono zéb zarina, tiwi 're wasipizari za'ra mono õ wamhã, tawapsi wa za tô ãsib'a'uwê na tãma 're wahâimana u'âsi za'ra.

**'Re ãhâimana u'âsi mono nhib'a'uwê norĩ 're ãwa'utu za'ra
mono zé wasu'u**

⁷⁻⁸ Duréihã ni'wa hã ma tô 'Re ãhâimana u'âsi mono pê'êzani zadawa para, ãne na ãma rob'ui'ééré:

“Á bãtã na, 'Re ãhâimana u'âsi mono mreme hã wapari za'ra wa'aba wamhã, aipo're si'ãri 're aihâimana za'ra wa'aba mono õ di za, ai'rã tete aba na. Duréihã aihĩ'rata norĩ wa'wa hã ma tô ãne na hã po're ãna sada tihâimana za'ra, 'Re ãhâimana u'âsi mono da. Ta norĩ hã a'ubuni wi 're nomro mono ré, nimahã bãtã na ma tô tiwasédé hã 'manharĩ za'ra, 'Re ãhâimana u'âsi mono hã te te sina pibu za'ra da, niha te te tãma rob'manharĩ za'ra õ zô pé, ãma ãwa'a su'u za'ra õ na hã.”

Ãne ma tô ni'wa hã ãma rob'ui'ééré.

⁹ Ãne duré, 'Re ãhâimana u'âsi mono mreme na rob'ui'ééré hã:

“Aihĩ'rata norĩ hã ma tô siwi ãpibu, ãma ãwa'a su'u za'ra õ zarina, niha te tãma rob'manharĩ za'ra õ zô pé, te te sina ãpibu za'ra da. ⁴⁰ na ãma wahub za'ra ré, marĩ ãwê na si te

're pawaptob u'âsi za'ra mono nherê, ma tô siwi ïwê'ô, aihî'rata norî wa'wa hã.

10 Taha wa, wa tô ta norî hã oto ïsiwi wê'ô pese za'ra. Taha wa, wa tô âne ïsima tinha: 'Ta norî hã ïzô si 're sôpré mono ô di oto. Ìnhimiroti zarina si 're ïhâimana za'ra mono da hã, te te sima 're wê za'ra mono ô di duré.' Âne ta norî âma te ïsima ïrotizé hã.

11 Taha wa, te oto ïsiwi ïwê'ô za'ra zéb zarina, wa tô ïmreme pire na ta norî âma tinha, âne: 'Tô sena, ta norî hã nimahã na hã dame sisisi ô di za, ti'ai wê u hã, ïwa 're ïwa'utu za'ra mono zéb da, te aré tâma ïpisutu za'ra zéb u hã.' "

Âne duréihã 'Re ïhâimana u'âsi mono mreme na rob'ui'ére siro hã.

12 Ìsisânawã norî, r'âwi te za 're asi'madâ'â pese za'ra wa'aba mo, 'Re ïhâimana u'âsi mono nhimiroti hã asimirosa'rata wasété aba zarina, asiwi 're wê'ô za'ra wa'aba mono wa, tiwi 're aipizari za'ra wa'aba mono tã da, ïrata 're dasi'ubumroi u'âsi mono da, dapisutu'wai wi hã. 13 Awê sidâpâsi te za duré asimiroti na 're asipawaptob u'âsi za'ra wa'aba mo, aipê'ê toi u'âsi Cristuhu âma si 're anomro wê wa'aba mono da, asiptete sina. Satanasihî nhimiroti wasédé hã wê newa, aiwasédé hã 're 'manharî za'ra wa'aba mono tã da, duré 'Re ïhâimana u'âsi mono nhimiroti hã asiwi 're wê'ô za'ra wa'aba mono wa, ai'rã tete na tiwi 're aihâimana za'ra wa'aba mono tã da, te za tô 're asipawaptob u'âsi za'ra wa'aba mo, rowê na wasiré 're wahâimana za'ra mono ré, ti'ai âma. 14 Wa norî hã Zezusi, wa te 're ïsaze na'rata za'ra mono zém hawi, wa tô wa te 're umnhasi za'êtê za'ra. Ta hawim haré, 're ïwadâ'â za'ra mono zéb u, wa te wasina 're umnhasi u'âsi za'ra mono wamhã, tawapsi wa za Zezusihi siré 're wahâimana u'âsi za'ra, ïsine dama wapire na wa te 're da'madâ'â u'âsi za'ra mono da.

15 Duréihã ni'wa hã 'Re ïhâimana u'âsi mono pê'êzani zadawa para, te te âma ïrob'ui'ére na wa za âma aima sahu za'ra wa'wa, âma aipo're si'âri za'ra wa'aba tã da:

"Â bôtâ na, 'Re ïhâimana u'âsi mono mreme hã wapari za'ra wa'aba wamhã, aipo're si'âri 're aihâimana za'ra wa'aba mono ô di za, ai'rã tete aba na. Duréihã aihî'rata norî hã ma tô âne na hã po're âna sada tihâimana za'ra, 'Re ïhâimana u'âsi mono da hã."

Âne duréihã âma rob'ui'ére, ïbaihã na hã.

16 E 'wam norî hã ma tô bété 'Re ïhâimana u'âsi mono mreme hã te te wapari za'ra nherê, siwi wê'ô pese za'ra. E 'wam norî hã te bété wasu'u, âne na âma ïrob'ui'ére hã. Mozési hã 'Re ïhâimana u'âsi mono waihu'u pese na, Ezitu hawi te te ïsimroi mono norî, te wasu'u za'ra. Ma'âpé âma asipo're pu'u za'ra wa'aba a'â, asi'uihã na.

17 Duré, e 'wam norĩ hã ma tô bété 'Re ìhâimana u'âsi mono hã siwi wê'õ pese za'ra, Mozési hã Ezitu hawi te te dazani za'ra pari, 40 na da'âma wahub ré, a'ubuni wi 're danomro mono ré hã. Tô õ norĩ hã tiwasédé te te ìmanharĩ za'ra norĩ hã ma tô siwi wê'õ pese za'ra. Tiwasédé hã te te ìmanharĩ za'ra zéb zarina, ma tô a'ubuni wi ai'utõ, ta norĩ hã. Ma'âpé ta norĩ wasu'u na asipo're pu'u za'ra wa'aba duré, waihu'u za'ra wa'aba da. 18 'Re ìhâimana u'âsi mono hã ma tô ta norĩ âma timreme pire na rowaihu'u sirõmo za'ra, âne: “Ta norĩ hã nimahã na hã sisisi õ di za, ti'ai wê u hã, ìwa 're ìwa'utu za'ra mono zéb da, te aré tâma ìpisutu za'ra zéb u hã.” Âne ma tô ta norĩ âma waihu'u siro, 'Re ìhâimana u'âsi mono hã, duréihã a'ubuni wi 're nomro mono ré, 'Re ìhâimana u'âsi mono nhimiroti te te siwi ìwê'õ za'ra zéb zarina, po're'õ u'âsi tiwi 're ìhâimana za'ra mono norĩ âma hã. 19 Tawamhã e marĩ, wa za wa norĩ hã âma waihu'u za'ra ni, ta norĩ wasu'u na hã. Ta norĩ hã 'Re ìhâimana u'âsi mono si te te 're saze za'ra mono õ wa, sisisi õ di, ti'ai wê u hã, ìwa 're wa'utu za'ra mono da, te te aré tâma ìpisutu za'ra zéb u hã. Taha wa, a norĩ wa'wa hã ta norĩ ne aiwasédé hã 're 'manharĩ za'ra wa'aba mono õ di za, 'Re ìhâimana u'âsi mono nhimiroti si 're ìmadâ'â za'ra wa'aba mono õ na hã.

4 1 Duréihã wahi'rata norĩ ma, te te ropisutu za'ra wamhã, e ta norĩ ma si ma tô rowê hã tâma pisutu za'ra, 'Re ìhâimana u'âsi mono hã. Mare di. Wa norĩ ma zama ma tô wama pisutu za'ra oto, 're ìdawa'utu u'âsi za'ra mono ne, 're wahâimana za'ra mono da oto, rowê uptabi na. Taha wa, 'râwi te za 're asi'madâ'â pese za'ra wa'aba mo, 'Re ìhâimana u'âsi mono te te wama ìropisutu za'ra zé hã asiwi 're simini za'ra wa'aba mono tõ da, duréihã wahi'rata norĩ hã te te ìsimini za'ra ne. 2 Ta norĩ hã 'Re ìhâimana u'âsi mono nhimiropisutu wê hã te te wapari za'ra nherê, te te sina uwaimrami za'ra õ di, te te âma saze za'ra õ wa. Tane duré, wa norĩ zama wa tô 'Re ìhâimana u'âsi mono wasu'uwê hã wa te 're wapari za'ra. Tane aiwa ìsimiropisutu wê na wa te 're saze za'ra mono õ wamhã, wa norĩ zama wa te wasina 're uwaimrami za'ra mono õ di za, te te wama ìropisutu za'ra zé hã, 're ìdawa'utu u'âsi za'ra mono ne, 're wahâimana za'ra mono da hã oto, rowê uptabi na hã. 3 'Re ìhâimana u'âsi mono, wa te wasina 're ìumnhasi za'ra mono norĩ si, wa za tô wasina wa te 're uwaimrami za'ra, 're ìdawa'utu u'âsi za'ra mono ne, rowê uptabi na oto âma 're ìwahâimana u'âsi za'ra mono zéb da hã, te te wama ìropisutu za'ra zém na hã. 'Re ìhâimana u'âsi mono te te sina 're ìumnhasi za'ra mono õ norĩ si te te sina 're uwaimrami za'ra mono õ di za, rowê hã. Duréihã ni'wa hã ma tô âne na âma rob'ui'ére, 'Re ìhâimana u'âsi mono mreme na, wahi'rata norĩ âma hã:

“Te ĩsiwi ĩwě’ô za’ra zéb zarina, wa tô ĩmreme pire na ta norĩ ãma tinha, ãne: ‘Tô sena, niwamhã dame sisisi ô di za, ti’ai wě u hã, ’re ĩdawa’utu za’ra mono ne, aré ĩwa ’re hâimana za’ra mono da, te tãma ĩpisutu za’ra zéb u hã.’ ”

Ãne duréihã ’Re ĩhâimana u’âsi mono mreme wasu’u na rob’ui’éré hã.

E tawamhã, ’Re ĩhâimana u’âsi mono hã zahadu te te tãma pisutu za’ra ô wa, te te sina uwaimrami za’ra ô di, wahi’rata norĩ hã. Mare di. Taha wab ô di. Ropoto na’rata hawimhã ma tô uburé marĩ hã te te sima apisutu sirõmo, marĩ hã te te dama ãma ’re ĩ’ab’manharĩ mono zéb da hã. ⁴ Duréihã ’Re ĩhâimana u’âsi mono zadawa wasu’u na ma tô ni’wa hã ãne na ãma rob’ui’éré, te te ro’apoto mono pari, ãma ĩ’awězém na hã, ãne:

“’Re ĩhâimana u’âsi mono hã zahadu 6 na bândâ hã ãma morĩ ré, ma tô te te ro’apoto. Taha pari, ãma awě wamhã, te oto wa’udu, romhuri ãna.”

⁵ Ãne tô ôhõ wasu’u hã, duréihã wahi’rata norĩ ãma ni’wa te te ãma ĩrob’ui’érézê hã, ’Re ĩhâimana u’âsi mono mreme na hã:

“Tô sena niwamhã dame sisisi ô di za, ti’ai wě u hã, ’re ĩdawa’utu u’âsi za’ra mono ne, aré ĩwa ’re hâimana za’ra mono da, te tãma ĩpisutu za’ra zéb u hã.”

⁶ Duréihã ti’ai wě wa, ’re ĩdanomro wě mono zé wasu’u wapari ’rata ’wa norĩ hã, ta norĩ hã ’re ĩdawa’utu u’âsi za’ra mono ne, ĩwa ’re hâimana za’ra mono da, ’Re ĩhâimana u’âsi mono te te tãma ĩpisutu za’ra zé hã te te sina uwaimrami za’ra ô di, ĩsimiroti hã te te ’re ’madâ’â za’ra mono ô wa, ta norĩ hã. E tawamhã ôhõ haré ma tô dawĩ sizâ ’Re ĩhâimana u’âsi mono hã, ’re ĩdawa’utu u’âsi za’ra mono ne, rowě uptabi na ’re ĩdanomro u’âsi mono zé hã. Mare di. Si’utõrĩ waihu’u ô di, ta hã. Ni’wam norĩ hã te za tô rowě uptabi na ’re ĩdahâimana za’ra mono zéb u ’re sisisi, ’Re ĩhâimana u’âsi mono te te tãma ĩpisutu za’ra zéb zarina. ⁷ E niha wa za tawamhã ãne na sena na wa te ãma ’re waihu’u za’ra. ’Re ĩhâimana u’âsi mono hã ma tô bândâ hã tô sena na pisutu, ’re ĩdawa’utu u’âsi za’ra mono ne, rowě uptabi na ’re ĩdanomro mono zéb u ’re ĩdanhisisi mono zéb da hã. Tawamhã, ãne te te pisutu wamhã, “ã bândâ na” ma tô sisi, ’Re ĩhâimana u’âsi mono hã. Ãne na ma tô apito Dawi hã dama sadawa wasu’u, duréihã wahi’rata norĩ hã a’ubuni wi ’re ĩnomro mono zém hawi, ãma wahub ahâ za’ra parip si. Ãne apito Dawi te te ãma ĩrob’ui’érézém na te aima ãma ĩrob’ui’éré pari za’ra wa’aba zé hã, ãne:

“Ã bândâ na, ’Re ĩhâimana u’âsi mono mreme hã wapari za’ra wa’aba wamhã, aipo’re si’ârĩ ’re aihâimana za’ra wa’aba mono ô di za, ai’rã tete aba na.”

⁸ Duréihã Zuzuwé hã t'ai wê u te te ïdanhimroi mono zé hã, e taha si, 'Re ïhâimana u'âsi mono, 're ïdawa'utu za'ra mono zéb da, te te dama ïpisutuzé hã, te wasu'u. Mare di. Taha si õ di. Taha si 'wa'âhã, 'Re ïhâimana u'âsi mono hã niwamhã te te aré wasu'u zahu õ di ãne hã, 're ïdawa'utu u'âsi za'ra mono ne, rowê uptabi na 're ïdanomro mono zé wasu'u hã. ⁹ 'Re ïdawa'utu u'âsi za'ra mono ne, rowê uptabi na 're ïdanomro mono zé hã, te tô 'Re ïhâimana u'âsi mono nhib'a'uwê norĩ ma 're hâimana u'âsi, õne u'â, duréihã ropoto na'rata hawi bâdâ hã 6 na ãma si'utõrĩ pari, bâdâ misi na romhuri ãna ïwa'utu ne, 'Re ïhâimana u'âsi mono hã. ¹⁰ Ni'wam norĩ hã 're ïdawa'utu u'âsi za'ra mono ne, rowê uptabi na 're ïdanomro mono zéb da hã, 'Re ïhâimana u'âsi mono te te dama ïpisutuzém na te te sina 're ï'uwaimrami za'ra mono norĩ hã, 're siwasutu za'ra mono õ di za oto, taha na 'Re ïhâimana u'âsi mono te te 're ï'awêsãmri mono zéb da hã. 'Re ïhâimana u'âsi mono hã duréihã te te ro'apoto mono pari, romhuri te te ïsazâri ne, 're siwasutu zahu za'ra mono õ di za oto, ta norĩ hã apâ. ¹¹ Taha wa, rowê uptabi na 're ïwanomro mono zéb zô si, wa za wasima 're wanhopré u'âsi, ãma 're wahâimana u'âsi za'ra mono da. Duréihã Izarazéhé nhihudu norĩ hã a'ubuni wi 're nomro mono ré, 'Re ïhâimana u'âsi mono nhimiroti te te siwi wê'õ pese za'ra wa, ta norĩ hã te te sina uwaimrami za'ra õ di, 're ïdawa'utu u'âsi za'ra mono zé hã. Ta norĩ ne, wa te wasiwi 're simini tõ za'ra mono da, wa za tô taha zô si wasima 're wanhopré u'âsi, ïwê uptabi zô si. ¹² 'Re ïhâimana u'âsi mono zadawa wasu'u hã ïhâiba ré ne, te tô wama 're hâimana u'âsi za'ra. Siptete uptabi di duré ïmreme hã, uburé marĩ hã ïsarina si te te dama ãma 're ï'ab'manharĩ mono zéb da hã, 'Re ïhâimana u'âsi mono hã. Sib'ézé 'wa si'uiwa ï'wa pese ne, te wama 're hâimana za'ra, ïsadawa wasu'u hã. Sib'ézé ï'wa pese na te za romnhi hã da te 're nhizazari za'ra, ïhi si da te 're urĩrĩ za'ra mono da. Tane duré, 'Re ïhâimana u'âsi mono zadawa wasu'u hã wa te 're wapari za'ra mono wamhã, 'râwi wap'ê na wanhimirosa'rada ïwê hã duré ïwasédé hã wa za wa te ãma 're waihu'u za'ra. ¹³ Uburé marĩ hã 'Re ïhâimana u'âsi mono wi, da te 're upsibi waihu'u za'ra mono õ di, te te 're ab'madâ'â tõ mono da hã. Ai'uréiwi ne, te uburé marĩ hã tãma 're hâimana, sô'awi. Taha ma si, wa za nimahã na hã wahâimanazém na tãma wasiwasu'u za'ra ni. Taha wa, wahi'rata norĩ ne, 're wahâimana za'ra mono õ di za, wa norĩ hã.

ZeZusi hã sasedoti ïpire uptabi na te te da'ãma 're ïromhuri mono zé wasu'u

¹⁴ Sasedoti ïpire uptabi na te tô ni'wa hã te te wa'ãma 're romhuri u'âsi. Ta hã ZeZusi, 'Re ïhâimana u'âsi mono 'ra. Timama u ma tô mo hâiwa u, 'râwi te te tiwi 're rowaptêrê u'âsi mono da, wama

za'ra. Taha wa, Zezusi, wa te 're ãsaze za'ra mono zém na tô sena dama 're ãwasiwasu'u za'ra mono zéb zarina, wa za tô ta hawim haré wanhiptete sina ãma 're wahâimana u'âsi za'ra. ¹⁵ Tawamhã tô õ hã sasedoti ãpire uptabi na, te te wa'ãma 're ãromhuri mono hã, e wahâimana nhib'uware na 're wahâimana za'ra mono nherê, wa'ãma 're siwamri mono õ di za, ta hã. Te za tô wa'ãma 're siwamri u'âsi. E marĩ wa. Ta hã ma tô Wa'uburé hã te te 're pibu aré, tiwasédé hã te te 'manharĩ da, wawasédé hã wa te 're 'manharĩ za'ra mono da, te te 're ãwa'apibui u'âsi mono ne. Tane nherê, tiwasédé hã te te 'manharĩ õ uptabi di, Zezusi hã. ¹⁶ Taha wa, wasina 're wahâtââ za'ra mono ãna, wa za 'rãwi wapê'ê 're 'Re ãhâimana u'âsi mono u 're wasihutu, da'ãma 're siwãrĩ mono da, te te 're ãda'ab'madââ u'âsi mono u hã. Wa'uburé te te 're wa'wapé za'ra mono ré, wa'ãma 're siwamri mono da, duré wa'ãma 're siwãrĩ mono da, wa za ãhã ré wapê'ê 're, ãtême 're wasihutu u'âsi, 'Re ãhâimana u'âsi mono u hã.

5 ¹ Duréihã ma tô ni'wam norĩ hã 'Re ãhâimana u'âsi mono hã te 're apisutu, tisiré sasedoti norĩ nhipai u, pire uptabi na te te 're romhuri za'ra mono da, tisiré zudezu norĩ ãma, 'Re ãhâimana u'âsi mono ma. Ta norĩ si ma tô 'Re ãhâimana u'âsi mono ma, danhoprubzé hã te te tãma 're sômri za'ra da'upana, ãma 're ãwata za'ra mono zéb da hã. Danhimizama ma tô duré da'upana te te tãma 're simro, dawasédé hã te te dama ãma 're ã'apari mono zéb da hã. ² Ta norĩ hã sasedoti ãpire uptabi norĩ hã ma tô hâimana nhib'uware na 're hâimana za'ra, ti'ai ãma dasiré 're hâimana za'ra mono wa, aiwa. Taha wa, ni'wam norĩ hã tiwasédé te te 're ã'manharĩ za'ra mono zém na 'rãwi 're ãsiwaih'u'u za'ra mono õ norĩ ãma, ma tô sasedoti norĩ hã 're siwamri za'ra, sada 're sahi su'u za'ra mono ãna. E marĩ wa. Ta norĩ hã aiwa tiwasété wi, 're hâimana nhiptete waih'u'u za'ra mono õ wa, ma tô tisiré norĩ ãma 're siwamri za'ra sasedoti norĩ hã, aiwa 're hâimana za'ra mono wa. ³ Duré ta norĩ hã da'udâna si, marĩ hã 'Re ãhâimana u'âsi mono ma, te te 're sômri za'ra mono õ di, dawasédé hã te te dama ãma 're ã'apari mono zéb da hã. Si'udâna zama ma tô marĩ hã te te tãma 're sômri za'ra sasedoti norĩ hã, dasine tiwasédé hã te te 're 'manharĩ za'ra mono wa. ⁴ E tawamhã ma tô 'rãwi ni'wam norĩ hã 're sipisutu za'ra, sasedoti ãpire uptabi na dama 're ãhâimana za'ra mono da hã. Mare di. Dasi'uihã na 're dasipisutu za'ra mono õ di, dapire da hã. 'Re ãhâimana u'âsi mono nhimipisutu zarina si, ma tô sasedoti ãpire uptabi na hã 're hâimana za'ra. Duréihã Arã hã sasedoti ãpire uptabi na tisiré norĩ ma, 're hâimana mono da, 'Re ãhâimana u'âsi mono te te ãpisutu ne, ma tô ta norĩ hã te te 're apisutu, tô õhõ si dapisutu'wai wa.

⁵ Tane duré, Cristu hã si'uihã na sipisutu õ di, sasedoti ãpire uptabi na dama 're ãhãimana mono da hã. 'Re ãhãimana u'ãsi mono si ma tô pisutu. Duréihã ma tô ni'wa hã ãne na ãma rob'ui'ére, 'Re ãhãimana u'ãsi mono te te ãrotizém na hã, ti'ra ma:

“A hã ã'ra te oto 're aihãimana mo. Taha wa, wa za ã'ra na te 're asisi, dama aipire na 're aihãimana mono da oto.”

⁶ ãne duré, 'Re ãhãimana u'ãsi mono mreme na ãma ãrob'ui'ére amo hã, Cristuhu ãma hã:

“A hã sasedoti norã, dama 're ãhãimana za'ra mono ne, te za dama 're aihãimana u'ãsi mo, duréihã Metizédéti hã sasedoti na pire na dama 're ãhãimana mono ne hã.”

ãne duréihã 'Re ãhãimana u'ãsi mono mreme na rob'ui'ére hã, Cristuhu ãma hã.

⁷ Zezusi hã ti'ai ãma 're morã ré, ma tô wawa sina Timama ma mre, mreme 'rãihã na, za te te ãrobzépatazém na te te pawaptob da. Tawamhã 'Re ãhãimana u'ãsi mono, Zezusihi mreme te te wapari wamhã, ma tô sima wã tô, te te pawaptob da. Zezusi hã uburé marã hã ãmama te te tãma ãpisutuzéb uwaibaba si, te te 're ab'manharã mono da, te te sima 're wã u'ãsi mono wa, ma tô ãmama hã sima wã, te te pawaptob da. 'Re ãhãimana u'ãsi mono hã te te sima wã 'wa'ãhã, te aré tô tiwaihu'u pese na sã'reptu, dã'ã tô da. ⁸ Zezusi hã 'Re ãhãimana u'ãsi mono 'ra, 're hãimana mono nherẽ, ma tô te te 're robzépata, ti'ai ãma 're morã ré hã. Taha zarina ma tô ãne hã si'ãma waihu'u: Ni'wam norã hã, 'Re ãhãimana u'ãsi mono nhimiroti te te 're 'madã'ã pese za'ra mono da, te te sima 're wã za'ra mono wamhã, taha zarina te za tô te te 're robzépata za'ra, ti'ab ré. ãne ma tô Zezusi hã si'ãma waihu'u. ⁹ Tawamhã Zezusi hã ti'ab ré, te te 're robzépata mono nherẽ, ãmama te te tãma ãwëzéb zarina si te te 're ab'manharã mono wa, ma tô sina uwaimra, uburé ãsimiroti te te 're ã'madã'ã pese za'ra mono norã hã te te 're sã'reptu za'ra mono da, hãiwa ãma dã'ã ãna 're hãimana u'ãsi za'ra mono da. ¹⁰ Duréihã 'Re ãhãimana u'ãsi mono, ma tô Zezusi hã pisutu, sasedoti ãpire uptabi na dama 're hãimana mono da, tãma da'ãma romhuri'wa da, duréihã Metizédéti hã sasedoti na pire na dama 're ãhãimana mono ne, uburé ma, 're hãimana mono da.

'Re ãhãimana u'ãsi mono nhimiroti mono bã ãpire wasu'u

¹¹ ãne na te duré aima ãma rowasu'u za'ra wa'aba da, wa tô aré ãsima wã. Tane nherẽ, pire di, te aima ãma ãwaihu'u za'ra wa'aba zéb da hã. E marã wa. Aima rowasu'u hãtob za'ra wa'aba wa. ¹² A norã wa'wa hã Cristu, 're ãsaze na'rata za'ra wa'aba mono zém na ma tô ai'ãma tironomro pese za'ra wa'wa. ãhã wamhã, te aré oto ãsazei'wa norã ma, romnhoré'wa da, 're aihãimana za'ra wa'aba mo,

'Re ihâimana u'âsi mono nhimiroti na rowasu'u'wa da hã, ta norĩ ma. Tane nherẽ, te zahadu a norĩ wa'wa hã ãsazeté'wa ne, 're aihâimana za'ra wa'aba mo. 'Re ihâimana u'âsi mono nhimiroti hã duréihã da te aima 're ãwasu'u na'rata za'ra wa'aba mono zé hã e aima waihu'u za'ra wa'aba ã bâ, te za apâ ãwasu'u na ãma aima sahu za'ra wa'aba ni. Ai'uté hã tisai uptabi na 're saihuri waihu'u mono õ wa, te za tinho'u na si 're saihuri. Ìna norĩ hã ãsai uptabi hã te te tãma 're ai waihu'u za'ra mono õ di. Tane, a norĩ wa'aba ma, te za tô 'Re ihâimana u'âsi mono nhimiroti hã duréihã da te aima 're ãwasu'u na'rata za'ra wa'aba mono zép si, da te aima 're wasu'u za'ra wa'wa apâ, 'Re ihâimana u'âsi mono nhimiroti ãpire hã zahadu aima pibui prã za'ra wa'aba wa, 're ãwaihu'u pese za'ra wa'aba mono zéb da hã, asi'uihã na hã. ¹³ Ai'uté norĩ ma, tãma waihu'u õ di, 'Re ihâimana u'âsi mono ma ãwẽ hã da te 're ãmanharĩ za'ra mono zéb da hã, duré tãma ãwẽ'õ hã da te 're 'manharĩ za'ra mono tõ da hã. Tane te duré a norĩ wa'wa hã zahadu ãne na 're aihâimana za'ra wa'aba mo. Ai'uté ne, te zahadu asimiza'rese'õ u'âsi 're aihâimana za'ra wa'aba mo, aima waihu'u za'ra wa'aba õ wa. ¹⁴ Ìprédum norĩ si te tisai uptabi na hã 're saihuri. Tane duré, 'Re ihâimana u'âsi mono nhimiroti ãpire hã tãma ãwaihu'u pese za'ra norĩ si te za waihu'u za'ra, 'Re ihâimana u'âsi mono ma, ãwẽ si da te 're ãmanharĩ za'ra mono zé hã, duré tãma ãwẽ'õ hã da te 're ãmanharĩ za'ra mono õ zé hã. Uburé marĩ hã ãwẽ zô, duré ãwasété zô, te te 're ãpibu za'ra mono zéb zarina si, te za te te 're waihu'u pese za'ra, ta norĩ ma si waihu'u pese wa.

6 ¹ Taha wa, Cristuhu wasu'uwẽ na 're saze za'ra wa'aba mono da, duréihã da te aima ãma 're ãrowasu'u na'rata za'ra wa'aba mono zém na si asima ãma 're rosa'rata u'âsi za'ra wa'aba mono õ di za oto. Taha nhipai u, te za 'Re ihâimana u'âsi mono nhimiroti mono bâ ãpire uptabi hã 're ãwaihu'u pese za'ra wa'aba mo Cristuhu wasu'uwẽ hã, aihâimana prédub sina ãma 're aihâimana za'ra wa'aba mono da. 'Re ihâimana u'âsi mono nhimiroti mono bâ, duréihã da te aima ãma 're ãrowasu'u na'rata za'ra wa'aba mono zém na apâ asima ãma 're roti zahu za'ra wa'aba mono õ di za oto. Taha na rowasu'u mono hã ma tô 're ãwaihu'u pari za'ra wa'aba mo, dapẽ 're, dadâ'â u'âsi ne dawasédé, da te 're 'manharĩ za'ra mono pari, ta hawi 're ãdasipizari za'ra mono zém na rowasu'u hã, duré 'Re ihâimana u'âsi mono, da te dasina 're ãumnhasi za'ra mono zém na rowasu'u hã. ² Duré â dawabzuri wasu'u na hã apâ asima ãma 're roti zahu za'ra wa'aba mono õ di za oto. Ta hã ma tô 're ãwaihu'u pari za'ra wa'aba mo. Rowahutu'wa norĩ hã, tinhib'rada hã da'rã nhisiwi te te 're ãsa'ra mono zarina, romhuri da, te te 're ãdapisutu za'ra mono wasu'u zama ma tô 're ãwaihu'u pari za'ra wa'aba mo,

Cristuhu wasu'uwẽ na 're saze za'ra wa'aba mono da, da te aima ãma 're ĩrowasu'u na'rata za'ra wa'aba mono zé hã. Tãibã duré, dahãiwã'utuzé wasu'u hã, duré 'Re ĩhãimana u'ãsi mono za te te dama 're ĩ'apisutu mono zéb zarina, ĩsimirob'manharĩ pipa ãma za 're ĩdahãimana u'ãsi za'ra mono zé wasu'u hã. ã norĩ wasu'u mono hã ma tô 're ĩwãihu'u pari za'ra wa'aba mo. ³Taha wa, ã norĩ wasu'u nhipai u, wa za oto roti ĩpire uptabi hã wa te 're wãihu'u za'ra, wahãimana prédum na oto ãma 're wahãimana za'ra mono da, 'Re ĩhãimana u'ãsi mono te te wama 're ĩ'apisutu mono zéb zarina si.

⁴⁻⁶ ãté ni'wam norĩ hã te za 'Re ĩhãimana u'ãsi mono nhimiroti hã sena na te te 're wãihu'u za'ra, taha zarina 'Re ĩhãimana u'ãsi mono nhimirowa'a na si 're hãimana za'ra mono da oto. ãté dasa ĩse hã da te 're ĩtẽẽ za'ra mono ne, te za 'Re ĩhãimana u'ãsi mono nhoprubzé hã tẽẽ za'ra, ta norĩ hã. ãté 'Re ĩhãimana u'ãsi mono pẽẽzani ré, te za duré ta norĩ hã dame 're hãimana za'ra. 'Re ĩhãimana u'ãsi mono mreime hã te za duré ãté wãihu'u za'ra, ĩsei uptabi hã, si'uihã na. ãté te za duré 'Re ĩhãimana u'ãsi mono pẽẽzani nhimipawaptobzé hã ĩsiré 're hãimana u'ãsi za'ra, te te 're wãihu'u pese za'ra mono wa, ãma 're ĩhãimana wẽ za'ra mono da hã. ãté ta norĩ hã Cristuhu nhimipawaptobzé hã te te wãihu'u pari za'ra nherẽ, te za oto tiwi 're sipizari za'ra, apã. E tawamhã apã da te 're pizari wãihu'u pese za'ra mono di za, 'Re ĩhãimana u'ãsi mono u hã. Mare di. 'Re ĩhãimana u'ãsi mono 'ra, wedepo'o nhonhi'rãmi na dââ da, da te dasiwi sasõmri wa, da te dasiwi ĩwẽ'õ pese za'ra ne, te za duré ta norĩ hã siwi wẽ'õ pese za'ra oto, Cristu hã. Taha zarina, te za duré Cristuhu ãma da te 're wasété za'ra, Cristuhu wi apã 're sipizari za'ra mono wa, ta norĩ hã.

⁷ ãne wa za oto ti'ai wasu'u na aima ãma romnhimiré'é za'ra wa'wa. Ti'a hã wẽ wamhã, tã hã 're ta'a mono sidãpãsi, te za ãma 're ro'wanhipré wẽ za'ra, ĩtede'wa norĩ ma. 'Re ti'ai 'ré su'u mono õ wa, te za ãma 're ro'wanhipré wẽ za'ra, ti'ai wẽ na hã. ãne wa, te za 'Re ĩhãimana u'ãsi mono hã ĩwẽ hã tãma pisutu, ti'ai wẽ ma hã. ⁸Tazahã, ro'wa si duré wab'ru zama, ãma 're poto za'ra mono wamhã, marĩ dai õ di, ti'a hã. Taha wa, ãté te za 'Re ĩhãimana u'ãsi mono hã siwi wẽ'õ pese. ãne wamhã, unhama ro'o na te za uprosi, ti'a hã. ãne 're ĩdahãimana za'ra mono zém na romnhimiré hã.

⁹ ĩsisãnawã norĩ, ĩma asawi pese za'ra wa'aba norĩ hã, ãne na te aima ãma romnhimiré'é za'ra wa'aba nherẽ, ai'ãma 're ĩhãitã'ã za'ra wa'aba mono õ di. Sena na wa tô oto ãma aiwãihu'u za'ra wa'wa, marĩ ĩwẽ si 're ĩmanharĩ za'ra wa'aba mono zém na hã, 'Re ĩhãimana u'ãsi mono te te 're ĩasõ'reptu za'ra wa'aba mono zéb zarina. ¹⁰ 'Re ĩhãimana u'ãsi mono hã ĩ'uwaibaba si te uburé marĩ

hã te te dama 're ab'manharĩ, te te dawĩ ãma 're a'upai mono ãna. Taha wa, tãma 're ĩromhuri za'ra wa'aba mono zém na nimahã na hã ãma po're si'ãri õ di za. ĩsib'a'uwẽ norĩ hã tãma 're ĩpawaptob za'ra wa'aba mono zém na hã, duré tãma 're ĩsawĩ pese za'ra wa'aba mono zém na hã, ãma po're si'ãri waihu'u õ di za. Te za tãma 're sipo're pu'u u'ãsi, ta norĩ ãma hã. **11** Wa tãma ĩsima aiwẽ za'ra wa'wa, tãma õhõ na si 'Re ĩhãimana u'ãsi mono ma, 're aihãimana u'ãsi za'ra wa'aba mono da, rob'rãsutu u, ĩwẽ uptabi zõ 're asimipari za'ra wa'aba mono zé hã asina 're uwaimrami za'ra wa'aba mono da. **12** Aiwa'a ãna õhõ ãma si 're aihãimana za'ra wa'aba mono da, wa tãma tãma 're ĩsima 're aiwẽ za'ra wa'wa. Ni'wam norĩ hã siptete sina, Cristu te te sina 're ĩ'umnhasi za'ra mono norĩ hã te za 'Re ĩhãimana u'ãsi mono hã ĩwẽ uptabi hã tãma sõmri za'ra, te te tãma ĩropisutu za'ra zéb uwaibaba. Ta norĩ, 're ĩhãimana za'ra mono ne, Cristu hã asina 're umnhasi za'ra wa'aba mono da, wa tãma tãma 're ĩsima 're aiwẽ za'ra wa'wa.

'Re ĩhãimana u'ãsi mono hã sena na te te dama ĩropisutuzé wasu'u

13 Duréihã 'Re ĩhãimana u'ãsi mono hã Abra'ãhã ma, te te ropisutu wamhã, tinhisi na ma tãma ropisutu, ni'wa hã 'Re ĩhãimana u'ãsi mono ma ĩsisi pire hã tãma 're hãimana mono õ wa, ĩsisi na te te tãma ĩropisutu da hã. **14** ãne ma tãma Abra'ãhã ma ropisutu: "ĩwẽ uptabi hã wa za te aima 're anhomri u'ãsi. Asihudu sidãpãsi, ahã uptabi na te za 're hãimana za'ra." ãne ma tãma 'Re ĩhãimana u'ãsi mono hã si'uihã na tãma ropisutu, Abra'ãhã ma hã. **15** Tawamhã Abra'ã hã wahub ahã na te sã 're simipari, simi'ẽ na. Taha wa, 'Re ĩhãimana u'ãsi mono, ma tãma tãma uwaimra oto, te te tãma ĩropisutuzém na hã. **16** Tane nherẽ, wa norĩ hã marĩ pire na wa te dama 're ropisutu za'ra mono wamhã, dama ĩpire norĩ nhisi na, wa za wa te dama 're ropisutu za'ra, sena na da te ãma 're wazaze za'ra mono da, duré da te ãma 're wawawã za'ra mono tã da. **17** Tane hã ma tãma duré 'Re ĩhãimana u'ãsi mono hã tinhisi pire na tãma ãma ropisutu za'ra, tinhib'a'uwẽ norĩ ma hã, tinhimirosa'rata na tãma sena te te ãma 're ĩsaprĩ mono õ na, ta norĩ hã te te ãma 're sazei pese za'ra mono da, 'Re ĩhãimana u'ãsi mono te te tãma ĩropisutu za'ra zéb zarina, ĩwẽ hã za te te sima 're ĩwaibui mono norĩ hã. **18** 'Re ĩhãimana u'ãsi mono hã sadawa nhipese õ uptabi di. Taha wa, te te dama ĩropisutuzé hã te te ãma saprĩ waihu'u õ di. Tinhisi pire na te te dama ĩropisutuzé hã te te ãma saprĩ waihu'u õ di duré. Taha wa, wa norĩ hã 'Re ĩhãimana u'ãsi mono, wa'ãma 're sisaprĩ za'ra mono da, ĩtẽme 're ĩwasisa'rei mono norĩ hã wa za oto wato sina 're wahãimana za'ra, ĩwẽ uptabi zõ wasina 're ĩwanhimipari

u'âsi za'ra mono zé hã, wanhiptete sina wa te wasima 're tété u'âsi za'ra mono da, 'Re îhâimana u'âsi mono te te wama îpisutu za'ra zé hã. **19** Uba're tétézé hã âi ba da te mei wamhã, te za tété uba're hã, wara tō da. Tane duré, îwē uptabi zô wasina 're îwanhimipari u'âsi za'ra mono hã. Taha zô si wasina 're wanhimipari za'ra mono wamhã, wanhiptete u'âsi wa za âma 're wanomro, wapê'ê na wa te âma 're wawã za'ra mono âna. Zezusi hã wa te wasina 're î'umnhasi za'ra mono hã sô 're îwanhimipari za'ra mono hã ma tô âzé 'ri para u, 'Re îhâimana u'âsi mono nhorōwa u, hâiwa âma hã. Zazahâ îhâpa na 'ri 're wa'wa nhitobzé wa'wai baba ma tô âzé, 'ri 're wa'wa îwē uptabi u, 'Re îhâimana u'âsi mono, dazô 're îsâmra mono zéb u hã. **20** Zezusi hã wa'udâna ma tô tamomo âzé, wawana za'ra. Ta hã te oto sasedoti îpire uptabi na dama 're hâimana u'âsi, 'Re îhâimana u'âsi mono ma, da'âma romhuri'wa na. Duréihã Metizédéti hã sasedoti na pire na dama 're îhâimana mono ne, te oto Zezusi hã pire uptabi na dama 're hâimana u'âsi.

Metizédétihi wasu'u

7 ¹ Ta hã Metizédéti hã Sarē na 'ri nho'ômo nhisi âma danhib'apito, ma tô dama 're hâimana. Sasedoti na te duré dama 're hâimana, 'Re îhâimana u'âsi mono ma, da'âma romhuri'wa na. Danhipai u dama pire uptabi na 're îhâimana mono ma, romhuri'wa na te 're hâimana. Duréihã Abra'ã norī hã, danhib'apito norī, maparane si'uiwa na te te âma ai'uté za'ra pari, apâ si'aba'réi ré, ma tô sōpētē Metizédéti hã, Abra'ã hã. Taha wa, ma tô mreme pire na Metizédéti hã âma mre, 'Re îhâimana u'âsi mono ma, marī hã îwē si te te tâma 're apisutu mono da, Abra'ãhã ma hã. ² Tawamhã Abra'ã norī hã te te da'âma ai'uté za'ra pari, danhibro te te î'wasari hã ma tô po'o, Abra'ã hã. Tinhaptōmo hi bâ ma tô te te po'o. Te te po'o mono pari, ma tô misi tâma tisō, Metizédétihi ma. Metizédétihi nhisi hã: “Danhib'apito, sena na si da'madâ'â'wa” te wasu'u. Duré îwaptērēzéb amo hã “Sarē âma danhib'apito”, îwaptērēzéb amo hã. Sarē hã “rowē” te wasu'u. Taha zarina, Sarē âma danhib'apito na îwaptērēzē hã, “Danhib'apito, dama rowē nhomri'wa” te wasu'u. ³ Taha mama nhisi ui'éré hã hâimana ô di, îbaihã na hã, îna nhisi me hã. Îhi'rata norī nhisi ui'éré zama, hâimana ô di duré. Îwaptã'âzém na âma îrob'ui'éré hã hâimana ô di duré, îdâ'âzém na îrob'ui'éré na zama. 'Re îhâimana u'âsi mono 'ra ne, te pire na dama 're hâimana u'âsi ta hã, Wanhib'apito ne, sasedoti na da'âma romhuri'wa 're hâimana u'âsi mono wa.

⁴ Metizédéti hã dama pire uptabi di. Ma'âpé âne na âma rosa'rata pese za'ra wa'aba. Abra'ã hã wahi'rata uptabi hã ma tô danhibro hã Metizédétihi ma po'o, pire na dama 're hâimana mono wa, ta hã. Te

te da'âma ai'uté za'ra pari, danhibro te te apâ siré i'wasari hã tinhiptômo hi bâ ma te te po'o, Abra'ã hã. Taha pari, misi ma tâma tisõ, Metizédétihi ma hã. ⁵ Réwihi nhihudu norĩ hã sasedoti na dama 're ihâimana za'ra mono hã, 'Re ihâimana u'âsi mono nhimiroti na Mozési te te âma irob'ui'ére zarina, te za danhibro hã te te dawí 're waibu, tisiré a'uwẽ norĩ wi, tô Izarazéhé nhihudu norĩ wi. Danhibro hã danhiptômo hi bâ da te 're po'o za'ra mono parip si, misi te za da te tâma 're sômri za'ra, Réwihi nhihudu norĩ ma hã. Abra'ã hã nhihudu si, siré 're hâimana za'ra mono nherẽ, te za te te tâma 're sômri za'ra, Réwihi nhihudu norĩ ma hã. ⁶ Tawamhã, Metizédéti hã Réwihi nhihudu, 're hâimana mono õ nherẽ, ma tô Abra'ã hã danhibro hã tâma tisõ. Tinhiptômo hi bâ te te po'o mono pari, ma tô misi tâma tisõ. Tawamhã Metizédéti hã mreme pire na ma tô âma mre, 'Re ihâimana u'âsi mono ma, i'wẽ uptabi hã te te tâma 're apisutu mono da, Abra'ã hã ma hã. Taha ma, ma tô 'Re ihâimana u'âsi mono hã tâma ropisutu, duréihã. ⁷ 'Re ihâimana u'âsi mono hã i'wẽ hã te te dama 're apisutu mono da, ni'wa hã da'âma mreme wamhã, ta hã pire na dama 're ihâimana mono. Æne hã wama waihu'u pese za'ra di. Taha wa, wa za Æne na âma waihu'u za'ra ni, Metizédéti hã Abra'ã hã ma, pire na 're ihâimana mono zém na hã. ⁸ Réwihi nhihudu norĩ hã, sasedoti na da'âma romhuri'wa norĩ hã te za tô te te dawí 're waibu danhibro hã, danhoprubzé da te tâma 're i'po'o za'ra mono hã. Tane nherẽ, te za uburé ta norĩ hã 're dâ'â za'ra, Réwihi nhihudu norĩ hã. Metizédétihi si, dâ'â Æna wama 're ihâimana mono ne, te wama 're hâimana sasedoti na hã, i'dâ'ázém na âma irob'ui'ére hã Æna hâimana õ wa, i'baihã na hã. ⁹⁻¹⁰ Réwi hã uburé sasedoti norĩ hi'rada te 're hâimana, uburé da'âma romhuri'wa norĩ hi'rada, danhoprubzé te te dawí 're i'waibui mono norĩ hi'rada. Metizédéti hã Abra'ã te te sôpêtẽ wamhã, Réwi hã zahadu poto õ di. Tane nherẽ, te Abra'ã hã hâiba 're tihâiba, tihirata hâiba 're. Taha wa, Abra'ã hã danhibro, Metizédétihi ma te te po'o wamhã, taha nhipai u ma duré Réwi hã tâma po'o, Abra'ã hã hâiba 're, hâimana wa. Tawamhã Metizédéti hã Réwihi ma zama pire na 're ihâimana mono zé, te wasu'u, Æ hã.

¹¹ Duréihã 'Re ihâimana u'âsi mono hã Æna 're dahâimana wẽ za'ra mono da, tinhimiroti te te dama 're anhomri mono wamhã, ma tô duré sasedoti norĩ te te da'âma 're iromhuri za'ra mono zéb da hã, te te dama 're awaihu'u. Sasedoti norĩ hã Réwihi nhihudu norĩ hã tinhimirohuri na 'Re ihâimana u'âsi mono ma, te te Æna 're uwaimrami uptabi za'ra mono 'wa'âhã, taha zarina te aré 'Re ihâimana u'âsi mono hã te te 're da'awêsãmri, dawasédé hã taha zarina te te da'âma 're ab'madâ'â mono õ wa aré. Tane nherẽ, ta

norĩ hã tinhimiromhuri na te te ãma 're uwaimrami uptabi za'ra mono õ di, 'Re ãhãmana u'ãsi mono ma hã. Taha wa, sasedoti ãhãba amo hã Réwihĩ nhihudu norĩ nhĩbrob're ãsébré hã te oto dama 're hãimana, Réwihĩ nhihudu 're hãimana mono õ nherê, duré Arãhã nhihudu hã 're hãimana mono õ nherê. Metizédéti hã sasedoti na pire na dama 're ãhãmana mono ne, te ta hã dama pire uptabi na 're hãimana oto. ¹² Duréihã sasedoti norĩ hã 'Re ãhãmana u'ãsi mono ma da'ãma romhuri'wa norĩ hã tinhimiromhuri na te te tãma ãma 're uwaimrami uptabi za'ra mono õ wa, ta norĩ nhĩbrob're sasedoti ãhãba amo hã ma tô duré ãzé. Sébré wamhã, ma tô duré 'Re ãhãmana u'ãsi mono hã tinhimiroti té hã ãsu dama tisõ, sasedoti norĩ hãimanazém na ãsimiroti 'rata na Mozési te te ãma ãrob'ui'ééré nhowa're're. ¹³ Ta hã sasedoti ãhãba amo hã danhowa're're ãsébré té hã, Wanhib'apito, te wasu'u. Ta hã Réwihĩ nhihudu 're hãimana mono õ di. Izarazéhé 'ra hãiba amo nhihudu te 're hãimana. Niwamhã ni'wa hã ãsiré Izarazéhé 'ra hãiba amo nhihudu hã sasedoti na dama 're hãimana mono õ di, ãsine da hã. Mare uptabi di. ¹⁴ Wanhib'apito hã Zudaha nhihudu, te 're hãimana. ãne hã dama waihu'u pese uptabi di, ãwasu'u na hã. Mozési hã, Zudaha nhihudu norĩ ãma te te dama ãma rowasu'u õ di, sasedoti na te te da'ãma 're ãmaimromhuri mono da hã.

Sasedoti aimawi hã Metizédétihi ne, dama 're ãhãmana mono zé wasu'u

¹⁵ ãhã wasu'u hã wama waihu'u pese za'ra di oto. E marĩ wa. Sasedoti ãhãba amo hã oto danhowa're're wama sébré za'ra wa, Metizédéti hã sasedoti na dama 're ãhãmana mono ne, 'Re ãhãmana u'ãsi mono ma da'ãma romhuri uptabi 'wa da hã oto. ¹⁶ 'Re ãhãmana u'ãsi mono nhimiroti 'rata na Mozési te te ãma ãrob'ui'ééré zarina, ma tô Réwihĩ nhihudu norĩ si, sasedoti na dama 're hãimana za'ra. E tawamhã Wanhib'apito hã Réwihĩ nhihudu 're hãimana mono wa, ma tô ãzé, sasedoti na dama 're hãimana mono da. Mare di. Ta hã Réwihĩ nhihudu 're hãimana mono õ di. E marĩ zarina, ma te ãzé, tawamhã. Ta hã si'utõrĩ waihu'u õ wa, ma tô ãzé, sasedoti na dama 're hãimana u'ãsi mono da. Nimahã na hã si'utõrĩ waihu'u õ di za tô, siptete uptabi wa, duré waihu'u pese uptabi wa. ¹⁷ Duréihã, ma tô ni'wa hã ãbãihã na ãma rob'ui'ééré ãwasu'u na hã, 'Re ãhãmana u'ãsi mono, ti'ra ma te te ãrotizém na hã, ãne:

“A hã, sasedoti norĩ, dama 're ãhãmana za'ra mono ne, te za sasedoti na dama 're ãhãmana u'ãsi mo, duréihã Metizédéti hã sasedoti na pire na dama 're ãhãmana mono ne.”

¹⁸⁻¹⁹ ãne wa, 'Re ãhãmana u'ãsi mono nhimiroti 'rata na Mozési te te ãma ãrob'ui'ééré hã pire na dama 're hãimana mono õ di oto. E

marĩ wa. Marĩ dai õ wa, te te ãma 're ĩda'anho'reptui mono zéb da hã. 'Re ĩhâimana u'âsi mono nhimiroti 'rata zarina, da te dasina tãma 're uwaimrami waihu'u za'ra mono õ wa, taha na te te sima da'ãma 're aroti mono õ di, dawasédé hã te te oto da'ãma 're ĩ'ab'madââ mono õ zéb da hã, duré taha zarina te te 're ĩda'awêsãmri mono da hã. Taha wa, aimawi hã ĩwẽ uptabi hã ma tô 'Re ĩhâimana u'âsi mono hã wama pisutu za'ra oto, sô 're ĩwanhimipari za'ra mono zéb da hã: Cristuhu si te oto sasedoti na pire uptabi na dama 're hâimana. Taha zô si wasina 're wanhimipari za'ra mono wamhã, wa za ĩtẽme 're wasihutu wapẽ'ẽ 're 'rãwi, 'Re ĩhâimana u'âsi mono u hã.

20-21 Duréihã sasedoti norĩ hã da'ãma romhuri'wa da, 're sisisi mono wamhã, tinhisi na mreime pire na te te tãma 're ropisutu za'ra mono õ di, 'Re ĩhâimana u'âsi mono hã. Tazahã, Zezusi hã dama sisasedoti da, 'Re ĩhâimana u'âsi mono te te oto pisutu wamhã, mreime pire na ma tô tãma ropisutu, ãne:

“Wa hã Danhib'apito uptabi, ĩmreme ĩpire na wa za oto aima ropisutu, ãne: ‘A hã sasedoti na te za dama 're aihâimana u'âsi mo. Niwamhã te dawı aiwazere õ di za, ta hawimhã.’ ãne wa aima ropisutu. ĩnhimiropisutu na te aima ãma ĩsaprĩ da hã, mare uptabi di za.”

ãne ma tô 'Re ĩhâimana u'âsi mono hã timreme ĩpire na tãma ropisutu siro, ti'ra ma, Zezusihi ma hã.

22 ãne na Zezusihi ma, timreme ĩpire na te te tãma ropisutu wa, 'Re ĩhâimana u'âsi mono te te dama ĩropisutuzép té ĩwẽ uptabi hã te wasu'u. Duréihã 'Re ĩhâimana u'âsi mono te te dama ĩropisutuzém nhipai u ĩwẽ uptabi hã, te wasu'u.

23 Duréihã sasedoti norĩ hã ahã uptabi na ma tô sisõwa're're te te da'ãma 're romhuri za'ra, 're si'utõrĩ mono sidâpâsi. 24 Tazahã, Zezusi hã nimahã na tidââ na te te sahu õ di za. Õne u'â te za 're hâimana u'âsi. Taha wa, sasedoti na te za tô dama 're hâimana u'âsi oto, watobro waihu'u ãna dawı. 25 Taha wa, te te 're da'anho'reptui waihu'u pese mono di ta hã, da te dasina 're ĩ'umnhasi za'ra mono zéb zarina, 'rãwi dapẽ'ẽ 're ĩtẽme 're ĩdasihutu mono norĩ hã, 'Re ĩhâimana u'âsi mono u hã. 'Re ĩhâimana u'âsi mono ma, da'ãma 're mreime mono da, dama 're hâimana u'âsi mono wa, te te 're da'anho'reptui waihu'u pese mono di, ta hã oto.

26 Taha wa, te oto õhõ si sasedoti ĩpire uptabi na hã wama 're hâimana za'ra, Timama ma, te te wa'ãma 're romhuri mono da. Taha si te 're timorĩ wẽ uptabi. Õhõ si ma tô 'Re ĩhâimana u'âsi mono hã te te 're wêsãmri, marĩ te te 're ab'manharĩ wasété mono õ wa. Taha wa, ĩwasédé hã sena na da te ãma 're sa'ra waihu'u za'ra mono õ di. 'Re ĩhâimana u'âsi mono hã ma tô tãma pisutu, ti'ai ãma

dawasété na 're ĩdanomro mono norĩ nhiti 're sãmra mono da oto, hãiwa ãma danhipai u dama pire uptabi na 're hãimana u'ãsi mono da. **27** Duréihã sasedoti norĩ 're ĩhãimana za'ra mono ne, 're hãimana mono õ di, Zezusi hã. Ta norĩ hã awẽ sidâpãsi te za tinhoprubzé hã si'udãna te te tãma 're sômri 'rata za'ra 'Re ĩhãimana u'ãsi mono ma, tiwasété parizéb da hã. Taha pari, te za duré da'udãna zama danhoprubzé hã te te tãma 're sômri za'ra, dawasédé te te dama ãma 're apari mono da. Tanei õ di, Zezusi hã sasedoti na te te wa'ãma 're ĩromhuri mono zé hã. Niwa marĩ te te 'manharĩ wasété waihu'u õ wa, awẽ sidâpãsi si'udãna tinhoprubzé hã te te tãma 're anhomri mono õ di, Timama ma hã. Misi haré ma tô tinhoprubzém na hã tãma sisõ, 'Re ĩhãimana u'ãsi mono ma, dazada dâ'ã da, sihãiba zawi ãna tãma sisômri wamhã, õhõ haré dawasédé hã te te oto ãma dama 're ĩ'apari mono zéb da hã. **28** Duréihã 'Re ĩhãimana u'ãsi mono nhimiroti 'rata na Mozési te te ãma ĩrob'ui'ére zarina, ma tô sasedoti da, te te 're da'apisutu, 'Re ĩhãimana u'ãsi mono hã. 'Re danomro wasété mono wa, danhib'uware na 're dahãimana za'ra mono nherẽ, ma tô ãne da hã te te 're da'apisutu. Tane nherẽ, ma tô 'Re ĩhãimana u'ãsi mono hã timreme pire na ti'ra ma ropisutu, taha si sasedoti na misi wama 're hãimana za'ra mono da oto. Ta hã te uburé marĩ hã ĩmama te te tãma 're ĩ'apisutu mono zéb zarina, te te tãma ãma 're a'uwaimrami u'ãsi, Timama ma hã.

Sasedoti ĩpire uptabi na Zezusi hã wama 're ĩhãimana mono zé wasu'u

8 ¹ ãhãna te aima ãma ĩrowasu'u za'ra wa'aba zé hã, e marĩ te wama wasu'u za'ra, ĩpire hã. Sasedoti ĩpire uptabi hã te oto wama 're hãimana za'ra. ãhã wasu'u si, ĩpire uptabi hã. 'Re ĩhãimana u'ãsi mono 're ĩsãmra mono zém nhimire niwĩ, te pire uptabi na 're sãmra u'ãsi hãiwa ãma, ĩwẽ uptabi nhimire niwĩ. ² Taha si te sasedoti ĩpire uptabi na te te 're romhuri, 'Re ĩhãimana u'ãsi mono nhorõwa ãma ĩwẽ uptabi 're, hãiwa ãma. Hãiwa ãma 'ri hã ni'wa te te ĩ'ri õ di. Tô õhõ si ma tô ĩwa 're ĩsãmra mono zéb da hã si'uihã na sima 'ri, Danhib'apito uptabi hã.

³ 'Re ĩhãimana u'ãsi mono hã ma tô sasedoti ĩpire uptabi norĩ hã te te 're apisutu, danhoprubzé hã da'upana te te tãma 're sômri za'ra mono da, ãma 're ĩwata za'ra mono zéb da hã, duré danhimizama hã da'upana te te tãma 're simroi mono da, taha na dawasédé hã te te dama ãma 're ĩ'apari mono zéb da hã. Taha zarina, ma tô duré Cristu hã tinhoprubzém na tãma sihãiba nho, 'Re ĩhãimana u'ãsi mono ma, sasedoti ĩpire uptabi na taha si wama 're hãimana za'ra mono wa oto. ⁴ Cristu hã ti'ai ãma 're sãmra u'ãsi mono 'wa'ãhã,

sasedoti na dama 're hâimana mono õ di aré. E marĩ wa. Sasedoti norĩ hã 'Re ãhâimana u'âsi mono ma, danhoprubzé hã da'upana te te tãma 're sãmri za'ra mono da, ãwana dama 're hâimana u'âsi za'ra mono wa ta norĩ hã, zudezu norĩ 're ãhâimana za'ra mono zéb zarina. ⁵ Da'awã da te 're 'madã'ã za'ra mono wamhã, dahãiba uptabi hã dama 're ãhâimana za'ra mono na te za da te 're waihu'u za'ra. Tane nherẽ, da'awã si hã marĩ hã ãma 're hâimana mono õ di. Tane duré, ti'ai ãma 'Re ãhâimana u'âsi mono nhorõwa hã, sasedoti norĩ hã ã're te te da'ãma 're ãromhuri za'ra mono zé hã. Hãiwa ãma 'Re ãhâimana u'âsi mono nhorõwa awã ne, te ta hã 're hâimana. Aiwab uptabi õ di. Hãiwa ãma ãsõrõwa si, ãwẽ uptabi hã. Duréihã Mozési hã romhã 'manharĩ na 'ri hã 'Re ãhâimana u'âsi mono ma, te te 'manharĩ õ ré, ma tô 'Re ãhâimana u'âsi mono hã ãne hã tãma pisutu: “Étẽ rãihã na asãmra ré, romhã 'manharĩ na 'ri 'manharĩ da, te aima ãpisutuzéb uwaibaba si, te za ãmanha.” ãne ma tô 'Re ãhâimana u'âsi mono hã tãma waihu'u, Mozésihi ma hã. ⁶ Tane nherẽ, 'Re ãhâimana u'âsi mono hã ma tô oto tãma pisutu Zesusihi ma, taha si te te oto da'ãma tãma 're romhuri mono da, pire uptabi na, sasedoti norĩ te te da'ãma 're ãromhuri za'ra mono zém nhipai u. Tane duré, 'Re ãhâimana u'âsi mono te te dama ãropisutuzép té hã, Cristu hã 'Re ãhâimana u'âsi mono ma, te te wa'ãma 're ãab'madã'ã mono hã. Wẽ uptabi di ta hã, duréihã 'Re ãhâimana u'âsi mono te te dama ãropisutuzéb 'rata ma hã. Danhipai u uptabi hã, marĩ ãwẽ uptabi na te te dama 're aropisutu mono wa, te wẽ uptabi na dama 're hâimana, te te dama ãropisutuzép té hã.

⁷ 'Re ãhâimana u'âsi mono te te dama ãropisutuzéb 'rada hã wẽ uptabi 'wa'ãhã, te aré tô õhõ si dama 're hâimana u'âsi. Te te dama ãropisutuzép té hã te te aré dama pisutu õ di.

⁸ Tane nherẽ, 'Re ãhâimana u'âsi mono hã te te dama ãropisutuzéb 'rada hã ma tô 'rãwi siwi wẽ'õ. ãne na ma tô dama ãma rowasu'u, duréihã:

“Wa hã Danhib'apito uptabi, wa za oto aima rowasu'u za'ra wa'wa, ãne: Nimahã na hã Izarazéhé nhihudu norĩ ma, wa za ãnhimiroti té hã tãma pisutu za'ra, Zudaha nhihudu norĩ ma zama.

⁹ Ta norĩ hi'rata norĩ ma, te ãropisutu 'rata ne, 're hâimana mono õ di za, te dama ãropisutuzép té hã. ãhi'rata norĩ hã Ezitu hawi te simroi mono wamhã, te tãma ãropisutu za'ra zé wa'rãmi, ãnhimiroti hã te te 're 'madã'ã za'ra mono õ di, ta norĩ hã. Taha wa, wa tô ta norĩ wi tiwi aipi'ra za'ra, si'uihã na 're hâimana za'ra mono da oto.

¹⁰ Tane nherẽ, nimahã bãtã na wa za te dama ãropisutuzép té hã tãma pisutu za'ra Izarazéhé nhihudu norĩ ma hã,

duréihã te dama ïropisutuzém nhowa're're. ã hã, wa wa hã Danhib'apito uptabi hã aima wasu'u za'ra wa'wa, ïnhimiroti tém na te dama ïropisutuzé hã.

Tawapsi wa za ïnhimiroti hã ïpěě 're te tãma 're anhomri, ïré 're nomro u'âsi mono wa, te te 're 'madâ'â pese za'ra mono da.

Ta norĩ nhib'apito, wa za oto tãma 're ïhâimana za'ra.

Tawamhã ïnhib'a'uwẽ na si te za tô ta norĩ hã ïma 're hâimana za'ra.

11 Wa hã Danhib'apito uptabi hã, ïnhib'a'uwẽ norĩ te te 're ïwaihu'u za'ra mono da, te te sima 're ïwasu'u za'ra mono zéb zarina si, te te 're ïwaihu'u za'ra mono õ di za oto ta norĩ hã. Duré ïsisânawã norĩ te te tãma 're ïwasu'u za'ra mono zéb zarina si, te te 're ïwaihu'u za'ra mono õ di za. Si'uihã na te za ïnhib'a'uwẽ norĩ hã tipěě na te te 're ïwaihu'u za'ra oto, dama wapu na 're ïhâimana za'ra mono norĩ hã, duré dama pire na 're ïhâimana za'ra mono norĩ zama.

12 ïwasédé hã te ãma 're ab'madâ'â mono õ di za oto. Marĩ te te 're ïmanharĩ wasété za'ra mono zém na hã 're ïsipo're pu'u mono õ di za duré.”

ãne 'Re ïhâimana u'âsi mono te te dama ïropisutuzép tém na te te ïrowasu'uzé hã.

13 Duréihã 'Re ïhâimana u'âsi mono te te dama ïropisutu 'rata nhowa're're, te te dama ïropisutuzép té hã te te dama pisutu wamhã, marĩ dai õ di oto, ïsimiropisutu 'rada hã. Taha wa, te za oto ai'utõ, marĩ ïtratate hã 're ïsi'utõrĩ pese za'ra mono ne.

Romhã 'manharĩ na 'ri wasu'u

9 ¹ 'Re ïhâimana u'âsi mono hã duréihã tinhimiropisutu 'rada hã te te dama sômri wamhã, ma tô dama pisutu za'ra, ãma 're ïdawata za'ra mono zéb da hã. Zãmorĩ za'ra ré, danhimizahãri sidâpãsi, romhã 'manharĩ na 'ri hã da te dasiwi ïsimizusi mono zéb da hã, ma tô duré dama pisutu, ãma 're ïdawata za'ra mono zéb da hã, duré ïwa 're ïsãmra mono zéb da zama. ² Duréihã romhã 'manharĩ na 'ri hã danhimizahãri sidâpãsi, 'Re ïhâimana u'âsi mono ma, da te dasiwi 're ïsimizusi mono hã maparane te 'ri 're wa'wa hã 're hâimana zahuré. 'Ri 're wa'wa ïmorĩ'rata ãma, te rob'uiwẽzé sima'warazé hã 're sa. Wedeza hã te duré ïwa 're sa, ï'u'êne hã 'Re ïhâimana u'âsi mono ma, ïwa da te 're ïsa'ra mono zéb da hã. 'Re ïhâimana u'âsi mono te, 'ri 're wa'wa hã ïwẽ uptabi na ïsisi hã. ³ Duré zazahã ïhãpa na 'ri 're wa'wa nhitobzé babarã niwĩ, 're ïhâimana mono hã maparane ãma 'ri 're wa'wa hãiba amo nhisi hã, 'Re ïhâimana u'âsi mono te, danhipai u ïwẽ uptabi hã, ïwa 're

ĩsãmra mono zém na taha nhisi hã. **4** Tame te êtẽ'ubuzi pré oru 'manharĩ na wedeza ne hã 're sa, 'Re ãhãmmana u'ãsi mono ma, wedewa'u zadaze zatazéb da hã. Wedehã're hã te duré 'ri para 're sa. Wedehã're mana wawimhã, oru 'manharĩ. Duréihã rob'ui'ére na 'Re ãhãmmana u'ãsi mono te te dama ãropisutuzém na, wedehã're nhisi hã. Wedehã're 're, te oru 'manharĩ hã simhi ne hã 're sa, mana na dasa nhisi hã ã're 're ãsa'wari mono hã. Arãhã nhiwedehu zama te duré wedehã're wa 're sa'wari, duréihã 'Re ãhãmmana u'ãsi mono nhimipawaptobzéb zarina, wedehu na ãsuire 're ãwairébé mono hã. Rob'ui'ére hã te duré ãwa 're sa'wari zahuré, 'Re ãhãmmana u'ãsi mono hã te te tinhib'a'uwẽ norĩ ma ãropisutuzém na rob'ui'ére hã, êtẽ tãmo baihá na. **5** Wedehã're nhisiwi te duré ropodo hã 're sima'wara zahuré, rob'manharĩ hã ropoto hãiba hã ãsaripi ré hã. 'Re ãhãmmana u'ãsi mono, tame 're ãsãmra mono zé, te ta norĩ hã wasu'u zahuré. Wedehã're nhisiwi, te ta norĩ hã 're papo zahuré. Wedehã're nhitobzé nhisi hã 'Re ãhãmmana u'ãsi mono, dawasédé te te dama 're ã'apari mono zém na ãsisi hã. ãne duréihã romhã 'manharĩ na 'ri wasu'u hã. Tane nherẽ, ãhãna hã te ãma aima rowasu'u uptabi za'ra wa'aba õ di. Syry na wa tã ãma aima rowasu'u za'ra wa'wa.

6 ãne ma tã danhimizahãri sidãpãsi 'ri paramhã marĩ hã sipu'u pese na ãwa da te 're sa'ra. Tawamhã sasedoti norĩ hã 'Re ãhãmmana u'ãsi mono ma da'ãma romhuri'wa norĩ hã awẽ sidãpãsi ma tã 're sisisi, 'ri 're wa'wa ãmorĩ'rata u hã, tame ãwa tinhimiromhuri mono bã marĩ na te te 're romhuri za'ra mono da. **7** Tane nherẽ, sasedoti norĩ nhib'apito, tisiré norĩ ma ãpire uptabi si ma tã maparane ãma 'ri 're wa'wa u 're zasi, 'Re ãhãmmana u'ãsi mono te hã, danhipai u ãwẽ uptabi hã ãwa 're ãsãmra mono zéb u hã. Wahub sidãpãsi ma tã misi haré 're zasi. Tamomo 're zasi mono wamhã, danhimizama waprui ré, te 're zasi, dawasété parizéb da hã, 'Re ãhãmmana u'ãsi mono ma, te te tãma 're sãmri mono da, si'udãna, duré da'udãna zama, duré da te dasina 're waihu'u za'ra mono õ nherẽ, dawasédé da te 're ãmanharĩ za'ra mono zé parizéb da hã. **8** E marĩ te tawamhã



Sasedoti
Ebreusi 9.6-7

wama wasu'u za'ra ãne hã, duréihã sasedoti norĩ hã 'Re ãhãmãna u'ãsi mono ma, te te da'ãma 're ãromhuri za'ra mono zé hã. 'Re ãhãmãna u'ãsi mono p'êzani hã ma tô ãne hã wama waihu'u za'ra. Duréihã romhã 'manharĩ na 'ri ãma hã, 'ri 're wa'wa ãmorĩ'rata u danhimizama hã dawasété parizéb da, 'Re ãhãmãna u'ãsi mono ma, da te 're ãsimroi mono zé hã, zahadu 're hãmãna mono ré, te 'ri 're wa'wa hãiba amoi u da hã sitom haré 're sa dawĩ, zahadu. Taha wa, 'Re ãhãmãna u'ãsi mono, ãwa 're ãsãmra mono zéb u hã, zahadu ãtême 're danhisisi waihu'u mono õ di. ãhã wasu'u, te ã hã wama wasu'u za'ra. ⁹E marĩ te duré wama wasu'u za'ra, 'ri 're wa'wa ãmorĩ'rata ãma danhimizama ãwa da te 're ãzata za'ra mono zé hã. Danhimizama hã dawasété parizéb da, da te tãma 're ãsõmri za'ra mono zém na, dap'ê'ê 're dadã'ã u'ãsi ne 're ãdanomro mono zéb zarina, dawasété si da te 're 'manharĩ za'ra mono wa, 'rãwi 're ãdasiw'ê'õ u'ãsi za'ra mono zé hã da te dasima ãma 're pari waihu'u za'ra mono õ di, dasi'uihã na hã.

Duré, 'Re ãhãmãna u'ãsi mono ma danhoprubzé hã, ãma 're dawata za'ra mono da, da te tãma 're ãsõmri za'ra mono zém na hã da te dasima 're pari waihu'u za'ra mono õ di, dap'ê'ê 're dadã'ã u'ãsi ne 're ãdanomro mono zéb zarina, dawasété si da te 're 'manharĩ za'ra mono wa, 're ãdasiw'ê'õ u'ãsi za'ra mono zé hã. ãne, wa te oto ãma 're ãwaihu'u za'ra mono zé hã, ã hã ãpire wasu'u na hã. ¹⁰'Re ãhãmãna u'ãsi mono ma, danhoprubzé, da te 're ãsõmri za'ra mono zé hã dap'ê'ê 're, da te dasima 're ãrosa'rata za'ra mono zém na te te wama rowasu'u õ di. Taré dasa hã marĩ, da te 're ãhuri mono zém na roti te wasu'u, duré marĩ wa'u, da te 're ããhuri mono zém na rowasu'u zama, duré 're dasihãiba wasété za'ra mono tõ da, 're ãdasi'upsõĩ pese za'ra mono zém na zama roti. ã norĩ na roti hã taré sõ'awi dahãiba na roti, ma tô dama 're hãmãna za'ra. Tane nherê, 'Re ãhãmãna u'ãsi mono hã 're ãdanomro mono zép té hã, te te dama ãpisutuzép téb ãma, ma tô oto dawĩ ai'utõ, ã norĩ na roti 'rada hã.

¹¹Cristu hã ma tô oto sisasedoti tõ, sasedoti ãpire uptabi na dama 're hãmãna mono da, 're ãdanomro mono zép té hã ãwê uptabi hã te te dama 're ab'madã'ã mono da oto. Tawamhã, hãiwa ãma 'ri hã, 'Re ãhãmãna u'ãsi mono hã ãwa 're ãsãmra mono zéb u, ma tô oto ãzé Cristu hã, danhib'rata na da te dasiwi ã'ri õ u, ropoto wazari ti'ai ãma 're ãsa mono õ u. Ti'ai ãma romhã 'manharĩ na 'ri nhipai u, wê uptabi di 'ri hã, hãiwa ãma hã. Pire uptabi na te ta hã 're sab u'ãsi. ¹²Tawamhã Cristu hã hãiwa ãma 'ri 're wa'wa u sébré wamhã, misi haré ma tô wanhowab za'ra ãzé, 'ri 're wa'wa ãwê uptabi u hã, 'Re ãhãmãna u'ãsi mono, ãwa 're ãsãmra mono zéb u hã. Tamomo ãtême sébré wamhã, e pone'êrebãĩ wapruĩ ré ma tô ãzé. E powawê 'ra wapruĩ ré zama, ma duré ãzé, te te tãma ãsõmri

da hã, duréihã sasedoti norĩ te te tãma 're ãsõmri za'ra mono ne hã. Mare di. Tiwaprui ré si ma tô ãtẽme ãzé Timama u hã, te te tãma sõmri da, taha na si wawasété hawi te te 're wa'anho'reptui mono da, misi haré. ¹³ Sasedoti norĩ hã 'Re ãhãimana u'ãsi mono nhimiroti 'rata na Mozési te te ãma ãrob'ui'ére zarina, te za pone'ërebã waprui hã syry na dahãiba nhisiwi te te 're sa'wari za'ra, niha wamhã, powawẽ ãba'õmo waprui hã, marĩ na dahãiba mana wawip si 're dasihãiba wasété za'ra mono wa, apã te te ãma 're dahãiba wẽ za'ra mono da, taha zarina pibu pese na 'Re ãhãimana u'ãsi mono ãma 're dawata za'ra mono da. Niha wamhã, powawẽ 'ra sipi'õ hã da te 're 'wa'a pese za'ra mono wa, taha pro hã 're ãsi'ru'a za'ra mono hã te za duré ta norĩ hã te te dahãiba nhisiwi 're sa'wari za'ra, te te ãma 're dahãiba wẽ za'ra mono da, duré taha na hã. ¹⁴ ãne hã duréihã danhimizama waprui na dahãiba mana wawi marĩ na 're ãdasihãiba wasété za'ra mono parizéb da hã, wẽ nherẽ, taha nhipai u, Cristuhu waprui si siptete uptabi di, dawasété parizéb da hã. E marĩ wa. Taha si wasété ãna 're hãimana u'ãsi mono wa. Taha wa, 'Re ãhãimana u'ãsi mono pẽzani waihu'u pese zarina ma tô wazada sisõmri za'ra 'Re ãhãimana u'ãsi mono ma, wazada dã'ã da, tiwaprui na te te 're wa'a'upsõi mono da, wapẽ'ẽ 're wadã'ã u'ãsi ne 're ãwanomro mono zéb zarina, wawasété si wa te 're 'manharĩ za'ra mono wa, 'rãwi 're ãwasiwẽ'õ u'ãsi za'ra mono zé hã te te oto wama 're aparĩ mono da. Taha zarina, wa za oto 'Re ãhãimana u'ãsi mono ma si, wa te 're romhuri za'ra, wawẽ na si wahãimanazém na wa te 're upa za'ra mono ãna.

'Re ãhãimana u'ãsi mono te te dama ãropisutuzép té wasu'u

¹⁵ Taha wa, te oto Cristuhu si te te da'ãma 're ab'madã'ã, 'Re ãhãimana u'ãsi mono te te dama ãropisutuzép té hã. Tidã'ãzém na ma tô da'awa'ã Cristu hã, dawasété na 're ãdanomro mono zém hawi te te 're da'anho'reptui mono da, zahadu 'Re ãhãimana u'ãsi mono te te dama ãropisutuzéb 'rada hã dama 're hãimana mono ré. Taha zarina te za oto 'Re ãhãimana u'ãsi mono hã tinhib'a'uwẽ da, te te 're ãapisutu mono norĩ hã te te sima 're awaibu, ãwẽ uptabi na te te tãma 're ãaropisutu mono zéb ré si, 're hãimana u'ãsi za'ra mono da ãré, ta norĩ hã.

¹⁶⁻¹⁷ Ni'wa hã dã'ã õ ré, te za tinhibrom na sisa'u dama roti, ãuirĩ na si da te niha dasima ãpo'o mono da hã. Sisõ'a ré, te za ãne na hã ãma rob'ui'ére ãbaihã na hã, pibu pese na ãsibro hã ãuirĩ na da te dasima ãpo'o mono zéb da hã. Tawamhã, e zahadu dã'ã õ ré, te za te te sima po'o, ãsimi'ui'ére zarina, te te tãma ãroti za'ra zéb zarina. Mare di. ãuirĩ na si te za tô ta norĩ hã ãsibro hã te te sima po'o, ãdã'ãzém na te te waihu'u za'ra wapsi. Tane duré, 'Re ãhãimana u'ãsi

mono te te dama ĩropisutuzé hã. **18** Duréihã sasedoti norĩ hã danhimizama te te 're ĩsimroi mono wapru na te te da'ãma 're romhuri za'ra mono õ 'wa'âhã, 'Re ĩhâimana u'âsi mono te te dama ĩropisutuzéb 'rada hã pire na aré dama 're hâimana mono õ di. Taré te aré dama 're hâimana. **19** Duréihã Mozési hã ĩmorĩ'rata na ma tô uburé 'Re ĩhâimana u'âsi mono nhimiroti na dama rowasu'u. Taha pari, ma tô powawẽ wapru hã â na waza, pone'ërebâi wapru zama. Tawamhã wesuirã suiro panhipti hã ma tô sada si'ẽ za'ra. Taha pari, simisutu ma tô pone'ërebâ zéré na wasisi, da te ĩséré pré na. Tawamhã danhimizama wapru na ma tô ãma di'i, â wazari powawẽ wapru na hã. Tawamhã ĩbaihã nhisiwi ma tô wesuirã suiro panhipti wasi hã sãsã'ã, danhimizama wapru na te te ãma di'i da, 'Re ĩhâimana u'âsi mono nhimiroti na rob'ui'ééré ré nhisiwi. Dahâiba nhisiwi zama ma tô duré te te sãsã'ã, te te ãma da'ahâiba di'i mono da, danhimizama wapru na. **20** Tawamhã Mozési hã ãne na te duré dama roti:

“Ã danhimizama wapru hã 'Re ĩhâimana u'âsi mono te te aima ĩropisutu za'ra wa'aba zé hã, pire na oto aima 're ĩhâimana za'ra wa'aba mono da hã, te aima wasu'u za'ra wa'wa. Taha wa, te te aima ãma ĩroti za'ra wa'aba zéb zarina, te za oto 're ĩ'madâ'â pese za'ra wa'aba mo, tâma ãma 're uwaimrami za'ra wa'aba mono da.”

Ãne te Mozési hã dama ãma roti. **21** Tawamhã romhã 'manharĩ na 'ri nhisiwib zama, ma tô duré wesuirã suiro panhipti wasi hã sãsã'ã, danhimizama wapru na te te ãma di'i da. Uburé marĩ hã 'Re ĩhâimana u'âsi mono ãma 're ĩdawata za'ra mono zéb da, 'ri para 're ĩsimasa mono nhisiwib zama ma duré sãsã'ã, te te ãma adi'i mono da. **22** Tane tô. 'Re ĩhâimana u'âsi mono nhimiroti 'rata na Mozési te te ãma ĩrob'ui'ééré zarina, ma tô danhimizama wapru na marĩ hã da te ãma 're di'i za'ra, 'ri para 're ĩsimasa mono hã, wasété ãna 're simasa mono da, 'Re ĩhâimana u'âsi mono ma hã. Dahâiba wib zama, ma tô duré ãma 're dasihâiba di'i za'ra, 'Re ĩhâimana u'âsi mono ma, dahâiba wasété ãna oto 're dahâimana za'ra mono da. Danhimizama hã da te 're simroi mono wa, ĩwapru hã tiwi 're ĩsisa'wari za'ra mono na si, te za ãma 're dasihâiba wẽ za'ra dahâiba mana wawip si, marĩ na 're dasihâiba wasété za'ra mono wamhã.

Cristu hã Timama ma dazada ĩsisõmrizé wasu'u

23 Ã norĩ hã ti'ai ãma romhã 'manharĩ na 'ri hã, duré uburé marĩ hã ĩwa 're ĩsimasa mono hã, hâiwa ãma 're ĩhâimana za'ra mono ne, te 're hâimana za'ra. Tane nherẽ, aiwab uptabi õ di, marĩ ĩpire da, 're hâimana za'ra mono õ nherẽ, 'ri hã ti'ai ãma hã, duré uburé ĩwa 're ĩropsimasa mono hã. Ta hã ma tô sasedoti norĩ hã danhimizama

wapru na te te 're di'i za'ra, taha zarina si 'Re ihâimana u'âsi mono ma, wasété âna 're hâimana za'ra mono da. Tane nherê, hâiwa âma marĩ hã sena 're ihâimana za'ra mono hã iwê na si, 'Re ihâimana u'âsi mono ma, 're hâimana za'ra mono da, ma tô iwê uptabi hã sada dêrâ. **24** Âne wa, Cristu hã dê'â pari hâiwa'utu wa, ti'ai âma danhib'rata na 'ri 're, sébré ô di, 'Re ihâimana u'âsi mono hã iwa 're isâmra mono zéb u hã. E marĩ wa. Ta hã ti'ai âma 'ri hã, taré hâiwa âma 'ri i'uptabi ne si 're hâimana mono wa, i'uptabi ô wa. Hâiwa âma 'Re ihâimana u'âsi mono hã iwa 're isâmra mono zéb u si ma tô âzé Cristu hã, tame te te oto wa'âma 're romhuri u'âsi mono da, Timama nho'a. **25** 'Re ihâimana u'âsi mono ma, da'âma romhuri'wa ipire uptabi hã ma tô duréhã siwaprosi itême 're zasi, 'Re ihâimana u'âsi mono te, 'ri 're wa'wa iwê uptabi u hã, sasedoti ipire uptabi hã. Wahub sidâpâsi ma tô itême 're zasi misi haré, danhimizama wapru hã te te tãma 're sômri mono da, da'udâna. Tane nherê, Cristu hã wahub sidâpâsi hâiwa âma 'Re ihâimana u'âsi mono hã iwa 're isâmra mono zéb u hã, itême 're zasi u'âsi mono ô di. Misi haré ma tô itême âzé, Timama u hã, ôhõ haré dazada tãma sisômri wa, Timama ma hã. **26** Cristu hã wahub sidâpâsi 'Re ihâimana u'âsi mono ma, dazada 're sisômri u'âsi mono 'wa'âhã, te aré ropoto na'rata hawim haré dazada 're dê'â u'âsi. Tawamhã robzépata za'êtê na te aré tô te te 're robzépata u'âsi. Tane nherê, za rob'râsutu u irob'umhutuzéb u si ma tô misi haré tãma sisõ, 'Re ihâimana u'âsi mono ma hã, dazada dê'â da, taha zarina dawasédé hã te te dama 're apari mono da oto, 'Re ihâimana u'âsi mono hã. **27** Misi haré te za aihîni 're dadâ'â za'ra. Taha parip si te za 'Re ihâimana u'âsi mono hã niwapsi da'awaihu'u, dawê na dawasété na zama, taha zarina te te dama arowairébé mono da oto. **28** Tane ma tô duré Cristu hã misi haré dazada dêrâ, dawasédé hã da'ahâ na te te oto dama âma 're i'apari mono zéb da hã. Tawamhã ti'ai u apâ wei morĩ zahu wamhã, dazada dê'â da, wei morĩ ô di za oto, taha zarina dawasédé hã te te duré dama 're i'apari mono da hã. Mare di. Sô 're isimipari za'ra mono norĩ si, te te oto isõ'reptu pese za'ra da si, te za wei mo apâ Cristu hã, ta norĩ zô si.

10 ¹ 'Re ihâimana u'âsi mono nhimiroti 'rata na Mozési te te âma irob'ui'ére zarina, iwê hã oto wama 're ihâimana za'ra mono zém na wa te âma 're waihu'u uptabi za'ra mono ô di. Wahub sidâpâsi ma tô danhimizama hã dasi'udâna da te tãma 're simroi u'âsi, 'Re ihâimana u'âsi mono ma hã, da te 're sahâri za'ra mono âna. Tane nherê, danhimizama da te tãma 're isimroi mono zé hã sib'uware di, dawasédé hã tô sena te te dama 're i'apari mono da hã, âma 're dawata za'ra mono da, râwi dapê'ê 're 'Re ihâimana u'âsi mono u 're idanomro mono norĩ ma hã. Dapê'ê 're, rowê na 're

ĩdahâimana za'ra mono zéb da hã, sib'uware di tô, 'Re ãhâimana u'âsi mono ma, danhimizama da te 're ãsimroi mono zé hã. ² 'Re ãhâimana u'âsi mono ãma 're ãdawata za'ra mono norĩ hã danhimizama hã dasi'udâna da te tãma 're ãsimroi mono zém na, ôhõ haré dawasédé hã te te dama 're apari uptabi mono 'wa'âhã, taha zarina 'rãwi 're dasiwẽ'õ u'âsi za'ra mono õ di aré, dawasété na hã. Taha zarina te aré oto danhimizama pãrĩ hã da te 're sahãri za'ra. ³⁻⁴ Tane nherẽ, powawẽ ãba'õmo wapru hã duré pone'ërebãi wapru hã dawasédé hã te te dama 're pari uptabi za'ra mono õ di. Taré te za danhimizama hã wahub sidãpãsi dasi'udâna 'Re ãhâimana u'âsi mono ma, da te 're ãsimroi mono zéb zarina, ãma 're dasipo're pu'u u'âsi za'ra, dawasété ré 're ãdahâimana za'ra mono zém na hã.

⁵ Taha wa, Cristu hã ti'ai u wei ãmorĩzéb u, ma tô Timama ma tinha, ãne:

“Danhimizama na duré dasazém na aima 're danhoprub za'ra mono da, a hã asina sô 're asimipari mono õ di. Tane nherẽ, ãhãiba hã ma tô ãma ãsõ, da'upana ãsina aima ãnhoprub da hã.

⁶ Danhimizama hã dawasété parizéb da, wahuré da te aima 're ãzata za'ra mono zém na zama, 're atoi mono õ di. Duré dawasété parizéb da, danhoprubzéb, da te aima 're ãsõmri za'ra mono na zama, asima 're atoi mono õ di.”

⁷ ãne te duré tãma tinha, Timama ma:

“Re ãhâimana u'âsi mono, wa hã wa wei ãwa mo ti'ai u, ãma ãpisutuzéb zarina, te oto ãsina aima ãma uwaimrami da, ãbaihã na ãwasu'u na duréihã da te ããma ãrob'ui'ére za'ra zéb zarina.”

ãne ma tô Cristu hã Timama ma siwasu'u.

⁸ ãne ma tô Cristu hã ãmorĩrata na Timama ma rowasu'u, tô: “Danhimizama da te aima 're ãzata za'ra mono zô, duré dasazém na aima 're ãdanhoprub za'ra mono zô, asina 're asimipari mono õ di a hã, dawasété parizéb da hã. Asima ãma 're atoi mono õ di, taha na hã.” ãne na ma tô Cristu hã Timama ma rowasu'u, Mozési hã ãsimiroti 'rata na te te ãma ãrob'ui'ére zarina, ãne hã da te 're 'manharĩ za'ra mono nherẽ. ⁹ Taha pari, ma tô duré Timama ma siwasu'u, ãne: “ãwa wa tô wei wa hã ti'ai u mo, ãma ãpisutuzéb zarina, te oto ãsina aima ãma uwaimrami da.” ãne ma tô Cristu hã Timama ma siwasu'u, duréihã dawasété parizéb da, danhimizama na duré dasazém na 'Re ãhâimana u'âsi mono ma, 're ãdanhoprub za'ra mono zé hã te te oto dawĩ sina sizãri da, taha nhowa're're tihãiba na tãma sõprub da oto, taha na si dawasédé hã te te dama ãma 're ãapari mono zéb da hã. ¹⁰ Zezu Cristu hã 'Re ãhâimana u'âsi mono te te tãma ãpisutuzéb zarina, te te tãma ãma uwaimrami wa,

tihâiba na tãma sôpru wa, ma tô te te 're wa'a'upsô wawasété hawi, tãma 're wanomro wê mono da oto. Misi haré ma tô tãma sisô, dazada dâ'â da, tô ôhõ na si dawasédé hã te te dama ãma 're apari mono da.

11 Sasedoti norĩ hã awê sidâpâsi te te da'ãma 're romhuri za'ra, 'Re ãhâimana u'âsi mono nhorõwa ãma. Danhimizama na 're ãdanhoprub za'ra mono zé hã te ahâ uptabi na te te tãma 're sômri za'ra, 'Re ãhâimana u'âsi mono ma, tô ôhõ si. Tane nherê, ã norĩ hã danhimizama na 're ãdanhoprub za'ra mono zé hã, dawasédé hã te te dama 're pari waihu'u za'ra mono õ di. 12 Cristuhu si, ma tô misi haré tihâiba hã tãma tisô, dazada dâ'â da, ôhõ haré dawasédé hã te te dama ãma 're ã'apari mono zéb da hã. Taha pari, te 'Re ãhâimana u'âsi mono nhimire niwĩ 're sãmra, pire uptabi na ãsiré te te 're da'ab'madâ'â mono da oto, õne u'âsi. 13 Tame te oto Cristu hã sô 're simipari u'âsi, 'Re ãhâimana u'âsi mono hã tinhitob'ru norĩ nhiptetezé hã te te tiwi ã'uprosi za'ra zéb zô hã, tãma sib'uwa uptabire na 're hâimana za'ra mono da oto, ta norĩ hã. 14 Misi haré 'Re ãhâimana u'âsi mono ma, dazada sisômri wa, ma tô dawasété hawi te te 're da'awaibu, 'Re ãhâimana u'âsi mono nhib'a'uwê si oto ãma 're danomro wê mono da.

15 'Re ãhâimana u'âsi mono pê'êzani hã ma tô ãne na wama waihu'u za'ra, sena na wa te wasina 're waihu'u za'ra mono da. ãne te te wama ãma ãwaihu'u na'rata za'ra zé hã:

16 “Nimahã båtã na wa za, te dama ãropisutuzép té hã, dama pisutu, duréihã te dama ãropisutuzém nhowa're're. ãne, wa wa hã Danhib'apito uptabi hã aima wasu'u za'ra wa'wa, ãnhimiroti tém na te dama ãropisutuzé hã.

Tawapsi wa za ãnhimiroti hã dapê'ê 're te dama 're anhomri, ãré 're danomro u'âsi mono wa, da te 're 'madâ'â pese za'ra mono da, ãmreme hã.”

17 ãne ma tô duré ãwasu'u nhana'remhã wama waihu'u za'ra:

“Dawasété na 're ãsipo're pu'u mono õ di za oto, marĩ, da te 're ãmanharĩ wasété za'ra mono zém na hã. Mare uptabi di za.”

18 ãhã wamhã, dawasédé hã 'Re ãhâimana u'âsi mono te te oto dama 're ã'apari mono zéb da hã, marĩ dai õ di oto, danhimizama na tãma 're ãdanhoprub za'ra mono zé hã, dawasété parizéb da hã. Tãibã oto ta hã.

'Re ãhâimana u'âsi mono u, 'rãwi dapê'ê na 're ãdasihutu mono zé wasu'u

19 ãsisãnawã norĩ, Zezusihi wapru hã tiwi ãpu'uzém na wazada ãdã'ázéb zarina, wa za oto wasina wapahi ãna 'Re ãhâimana u'âsi mono u 're wasihutu 'rãwi wapê'ê na, robzei u'âsi tãma 're wamreme

zusi mono da. Duréihã sasedoti norĩ hã, 'Re ìhâimana u'âsi mono 're ìsãmra mono zéb u, 'ri 're wa'wa u 're ìsisisi mono ne, wa za oto wa norĩ hã 'râwi ìtême 're wasihutu, wasina 're wapahi za'ra mono ãna, tâma.

20 Duréihã 'Re ìhâimana u'âsi mono 're ìsãmra mono zéb 're, 'ri 're wa'wa nhitobzé hã zazahã ìhâpa hã te dawì 're hâsipra u'âsi pi'reba, ìtême 're danhisisi tõe mono da. Tane nherê, Cristu hã ma tõe oto wama 'ridawa za'ra tidâ'âzém na, zazahã ìhâpa na 'ri 're wa'wa nhitobzé wa'wai baba, ìtême 're ìdanhisisi mono ne, wapê'ê na ìtême 're wasihutu mono da, 'Re ìhâimana u'âsi mono u, robzei uptabi na ìme 're wanomro u'âsi mono da oto. 21 Sasedoti ìpire uptabi na te oto wama 're hâimana. Taha si te tâma umnhasi na uburê 'Re ìhâimana u'âsi mono nhìb'a'uwê norĩ hã te te 're ab'madâ'â tâma, pire uptabi na. 22 Wawasété na 're wanomro mono wa, 'râwi 're ìwasiwê'õ sãmri za'ra mono zé hã ma tõe Cristu hã tiwapru na te te wama 're apari, duréihã sasedoti norĩ hã te te ãma 're dahâiba wê za'ra mono da, danhimizama wapru na syry na te te ãma 're ìdahâiba di'i za'ra mono ne. Sasedoti norĩ hã 're sihâiba wasété za'ra mono ãna, 'Re ìhâimana u'âsi mono u 're sisisi mono da, 're ìsihâiba upsõi pese za'ra mono ne, wa oto wa norĩ hã wahâiba upsõi pese ne tâma 're wahâimana wê za'ra, 'Re ìhâimana u'âsi mono ma si. Taha wa, wa za oto wapê'ê na 'râwi ìtême 're wasihutu, wahâimanazé sena ré si, 'Re ìhâimana u'âsi mono u hã, õhõ si wa te oto wasina 're ì'umnhasi za'ra mono zéb zarina. 23 'Re ìhâimana u'âsi mono hã wama umnhasi za'ra di, te te wama 're ì'aropisutu mono zéb uwaibaba, te te wama ãma 're ì'a'uwaimrami mono da hã. Taha wa, wanhiptete sina wa za ìwê uptabi zõe 're wanhimipari u'âsi za'ra, 'Re ìhâimana u'âsi mono hã te te wama ìropisutu za'ra zém na wa te 're wawã za'ra mono ãna, sena na za wama 're ìhâimana za'ra mono na wa te dama 're ìwasu'u za'ra mono zéb zarina. 24 Wa za duré wasi'ãma 're wapo're pu'u u'âsi za'ra, marĩ na 're ìwasipawaptob za'ra mono zéb da hã, duré taha zarina 're ìwasisawi pese za'ra mono zém na wa te wasima ãma 're ì'uwaimrami za'ra mono zéb da hã, duré marĩ wê na wa te wasima ãma 're ìwa'rãmi wê za'ra mono zém na zama. 25 Ni'wam norĩ hã Cristuhu zazei'wa dasiré 're hâimana za'ra mono wa, rowahutu u dasiré 're si'rã'õtõ mono nherê, ma tõe ta norĩ hã rosahâri pese za'ra oto. Tane nherê, wa norĩ hã wasiré 're ìwasi'rã'õtõ mono zé hã wa te wasiwi sazãri za'ra õ di za. Tô'ã. Wa za tõe wasiré 're wasi'rã'õtõ u'âsi, ãma 're wasipawapto pese za'ra mono da, 'Re ìhâimana u'âsi mono hã wa te wasina 're ì'umnhasi za'ra mono zém na si 're wanhiptete za'ra mono da. E marĩ wa. Wanhib'apito apã we ìmorizéb u hã bâdã hã romhutu na aima waihu'u pese za'ra wa'aba wa.

26 Ni'wam norĩ hã Cristuhu wasu'uwẽ, sena na 'rãwi te te sina 're waihu'u pese za'ra mono nherẽ, duré te te sima 're ãwẽ za'ra mono zéb zarina, 're ãhãimana wasété 'rata za'ra mono zém na si 're hãimana u'ãsi za'ra mono wamhã, marĩ hã 're 'maihãimana mono õ di, ta norĩ da hã, ãwasédé te te tãma 're ãpari za'ra mono zéb da hã, ta norĩ ma hã. 27 Ta norĩ hã 'Re ãhãimana u'ãsi mono zada, 're hãimana za'ra mono wa, te za 'Re ãhãimana u'ãsi mono hã uprosi unhamã ro'o za'ëté na, te te siwi 're ãwẽ'õ pese za'ra mono norĩ hã. Taha u hã, te za ta norĩ hã sina pahĩ na 're simipari za'ra oto. 28 Duréihã 'Re ãhãimana u'ãsi mono nhimiroti 'rata na, Mozési te te ãma ãrob'ui'ééré hã ni'wam norĩ hã te te siwi 're wẽ'õ pese za'ra mono wamhã, ta norĩ hã ma tô da te dasiwi 're simro, ãma 're dapẽ'ézé waihu'u za'ra mono ãna. Marĩ ãwasédé hã ta norĩ hã te te 're 'manharĩ za'ra mono ré, siwaptom na titõmo na ã'madã'ã za'ra 'wa norĩ hã, ãwasété na te te dama 're ãwasu'u za'ra mono zéb zarina, ma tô da te dasiwi 're simro, ta norĩ hã. 29 ãne, duréihã 'Re ãhãimana u'ãsi mono nhimiroti 'rata wẽ'õ'wa norĩ ma, 're ropipa za'ra mono di. E niha tawamhã za, 'Re ãhãimana u'ãsi mono 'ra, te te siwi 're ãruiwapari za'ra mono norĩ ma, 're ãromhãimana za'ra mono zé hã za. Tãma 're ropipa uptabi za'ra mono di za tô. 'Re ãhãimana u'ãsi mono hã te za tô ta norĩ hã hã za'ra za'ëté, rob'rãsutuzéb ãma hã. Duré 'Re ãhãimana u'ãsi mono te te dama ãropisutuzép tém na, Cristu hã dazada ãdã'ãzé hã taré newa, te ta norĩ hã te te ãma 're rosa'rata upa za'ra. Ta norĩ hã te duré 'Re ãhãimana u'ãsi mono pẽ'ézani ãma te te 're wasété u'ãsi za'ra, ãsimizawi uptabi ãma. 30 Taha wa, te za tô ta norĩ hã nimahã na hã hã za'ra, 'Re ãhãimana u'ãsi mono hã. Duréihã ma tô ãne na ni'wa hã ãma rob'ui'ééré siro, 'Re ãhãimana u'ãsi mono mreme na hã. ãne na hã 'Re ãhãimana u'ãsi mono mreme hã wama waihu'u pese za'ra di oto:

“Wa hã ãsiwaprosi wa za te 're da'a'ruiwa'ãbã. ãwétési wa za te dama ãma 're awa'rãmi, marĩ, da te 're ã'manharĩ wasété za'ra mono norĩ ma hã.”

ãne duré 'Re ãhãimana u'ãsi mono mreme na rob'ui'ééré amo hã:

“Wa hã uburé Danhib'apito uptabi hã wa za ã'uwaibaba uptabi na si te 're da'ahã za'ra, dawasété na ãsiwaprosi te 're ãda'awaihu'u mono zéb zarina.”

ãne 'Re ãhãimana u'ãsi mono mreme na rob'ui'ééré hã. 31 Ni'wam norĩ hã 'Re ãhãimana u'ãsi mono nhib'rata, 're ãrere'e mono ne, te te 're hã za'ra mono wamhã, tãma 're ropipa uptabi za'ra mono di za, ta norĩ ma hã.

32 Ma'ãpé, ãma asipo're pu'u za'ra wa'aba, duréihã Cristu hã Danho'reptui'wa na asina 're ãwaihu'u na'rata za'ra wa'aba mono

zém na hã, 'Re ìhâimana u'âsi mono nhimipawaptobzéb zarina. Ta hawim haré, Cristuhu zazei'wa oto 're anomro aba mono wa, marĩ na 're robzépata za'ětē za'ra wa'aba mono nherē, ma tô asiptete sina âma 're aihâimana u'âsi za'ra wa'aba mo, tiwi 're aipizari za'ra wa'aba mono âna. **33** Nimahã na hã ma tô ni'wam norĩ hã danho'a te te ai'âma 're wasété za'ra wa'wa. Ma tô duré da te aima 're rob'manharĩ wasété za'ra wa'wa, danho'a. Duré nimahã na asiré norĩ ma, da te 're rob'manharĩ wasété za'ra mono wamhã, ma tô 're ìpawaptob za'ra wa'aba mo, ta norĩ zu, da te aima 're rob'manharĩ wasété za'ra wa'aba mono da nherē. **34** Dazazéb 're, 're ìhâimana za'ra mono norĩ âma 're aipē'ězé za'ra wa'aba mono zéb zarina, ma tô ta norĩ me aipē'ē na 're ìrobzépata za'ra wa'aba mo, ìhâiba zu. Duré asibro hã da te aiwi 're waibui wa'aba mono nherē, ma tô ato sina 're aihâimana za'ra wa'aba mo. Aiwi 're robzei'õ za'ra wa'aba mono õ di, taha na hã. E marĩ wa. Ti'ai âma asibrom nhipai u, hâiwa âma ìwē uptabi hã ìsi'utõrĩ'õ hã za aima 're ìhâimana za'ra wa'aba mono na hã aima waihu'u pese za'ra wa'aba wa. **35** Taha wa, Cristu hã aipahi âna asina 're ì'umnhasi za'ra wa'aba mono zé hã asiwi 're ìwē'õ za'ra wa'aba mono zéb zarina, 're rēme za'ra wa'aba mono õ di za. Asiptete sina te za tô âma 're anomro u'âsi aba mo. Âne 're aihâimana za'ra wa'aba mono wamhã, taha zarina te za 'Re ìhâimana u'âsi mono hã ìwē uptabi na aima wa'âbâ za'ra wa'wa, nimahã na hã. **36** Marĩ na 're robzépata za'ra wa'aba mono nherē, duré Cristuhu zazei'wa 're anomro aba mono wa, da te aima 're rob'manharĩ wasété za'ra wa'aba mono nherē, te za tô asiptete sina, asina 're ì'umnhasi u'âsi za'ra wa'aba mo, tiwi 're aipizari za'ra wa'aba mono tõ da. Âne zarina, asina tãma âma 're uwaimrami za'ra wa'aba mono wamhã, 'Re ìhâimana u'âsi mono te te aima 're ìwē za'ra wa'aba mono zéb zarina, te za tô tãma 're anomro wē wa'aba mo. Tawapsi, te za 'Re ìhâimana u'âsi mono hã te te aima ìropisutu za'ra wa'aba zé hã ìwē uptabi hã oto asina ì'uwaimrami za'ra wa'wa. **37** Duréihã 'Re ìhâimana u'âsi mono zadawa wasu'u'wa hã ma tô âne ìmreme na rob'ui'ééré, Cristuhu wasu'u na hã:

“Ta hã za we ìmorĩ hã niwamhã oto wei morĩ wamhã, sô rowaptâ'â õ di za. Romhutu na te za tô wei mo.

38 Ni'wam norĩ hã te tãma 're ìwē za'ra mono zéb zarina si 're ìnomro wē mono norĩ hã, ta norĩ hã Danho'reptui'wa na te te sina 're ìzaze za'ra mono zéb zarina si, wa za te 're awēsãmri, ìwasédé hã te âma 're ab'madâ'â mono õ wa za oto, ta norĩ âma hã. Âne wa, te za rowē uptabi na ì'rata 're hâimana u'âsi za'ra, ta norĩ hã.

Tane nherē, ni'wam norĩ hã ìwi 're sipizari za'ra mono wamhã, âma 're ìto za'ra mono õ di za oto, ta norĩ âma hã.”

Ãne duréihã 'Re ìhâimana u'âsi mono zadawa wasu'u'wa te te ìmreme na ãma ìrob'ui'érezé hã, ìbaihã na hã.

39 Tane nherê, ta norî ne, wa norî hã 're wahâimana za'ra mono õ di. Nimahã na 'Re ìhâimana u'âsi mono wi 're wasipizari za'ra mono õ di, ta norî ne. Taha wa, 'Re ìhâimana u'âsi mono hã niwamhã ta norî zu te te wa'uprosi õ di za. Taha si wa tô wa te wasina 're umnhasi u'âsi za'ra, te te 're ìwa'anho'reptui mono da hã. Taha zarina te za tô wa norî hã wa'anho'reptu, ì'rata oto 're ìwahâimana u'âsi za'ra mono da hã, 'rãwi.

'Re ìhâimana u'âsi mono, da te dasina 're ì'umnhasi za'ra mono zé wasu'u

11 ¹ E niha, wa te wasina 're ì'umnhasi za'ra mono zé hã, 'Re ìhâimana u'âsi mono hã. 'Re ìhâimana u'âsi mono hã wa te wasina 're umnhasi za'ra mono wamhã, ta hã te te wama 're ì'apisutu mono zéb zarina, ìwê uptabi zô si 're ìwanhimipari u'âsi za'ra mono na, tô sena za te te wama ãma ì'uwaimrami za'ra na, wa za wa te wasina 're waihu'u za'ra. Duré uburé marî hã watômo na wa te 're ì'madâ'â waihu'u za'ra mono õ zama, wa za duré wa te 're waihu'u za'ra, sena na 're ìhâimana za'ra mono na hã. Ãne 'Re ìhâimana u'âsi mono hã wa te wasina 're ì'umnhasi za'ra mono zé hã. ² Duréihã wahi'rata norî hã, 'Re ìhâimana u'âsi mono te te sina 're ì'umnhasi za'ra mono zéb zarina si, ma tô 'Re ìhâimana u'âsi mono hã te te 're awêsãmri, ta norî hã.

³ 'Re ìhâimana u'âsi mono, wa te wasina 're ì'umnhasi za'ra mono zéb zarina, wa tô, sena na wa te 're waihu'u za'ra, 'Re ìhâimana u'âsi mono te te ìnharízéb zarina, marî õ uptabi ré, te te ì'aropoto mono na hã. Datômo na da te 're ì'madâ'â waihu'u za'ra mono õ na si, ma tô te te ro'apoto, watômo na wa te oto 're ì'madâ'â za'ra mono da hã. Ãne na wa tô duré sena na wa te 're waihu'u za'ra, 'Re ìhâimana u'âsi mono si, wa te wasina 're ì'umnhasi za'ra mono zéb zarina hã.

⁴ Abé hã, 'Re ìhâimana u'âsi mono si te te sina 're ì'umnhasi mono zéb zarina, ma tô ìwê uptabi na tãma tinhopru, 'Re ìhâimana u'âsi mono ma. Ca'ìhî nhibzari si, te te wêsãmri õ di, 'Re ìhâimana u'âsi mono hã. Taha wa, Abé hã 'Re ìhâimana u'âsi mono si te te sina 're ì'umnhasi mono zéb zarina, ma tô 'Re ìhâimana u'âsi mono hã wêsã, 're ìmorî wê na zama. Taha wa, ma tô Abéhé nhoprubzép si wêsã. Ãne na Abé hã 'Re ìhâimana u'âsi mono te te sina 're umnhasi mono wa, duréihã dâ'â nherê, zahadu hãiba ré wama 're ìhâimana za'ra mono ne, te wama 're hâimana za'ra, taha ãma 're wasipo're pu'u u'âsi za'ra mono wa.

⁵ Duré Enoti hã 'Re ìhâimana u'âsi mono te te sina 're ì'umnhasi mono zéb zarina, ma tô hãiba ré ré mo, hãiwa u. 'Re ìhâimana u'âsi

mono hã ma tô hãiba ré ré sitême ti'â. Taha wa, ni'wa te te waihu'u õ di ta hã, idâ'ázém na hã. Duréhã 'Re ihâimana u'âsi mono zadawa wasu'u'wa hã ma tô âne na rowasu'u ibaihã na, Enotihi wasu'u na hã: “Re ihâimana u'âsi mono hã hãiwa u sitême te te âri õ ré, ma tô Enotihi ma 're to, 're imorĩ wẽ zéb zarina, 'Re ihâimana u'âsi mono hã.” ⁶ Ni'wam norĩ hã 'Re ihâimana u'âsi mono te te sina 're umnhasi za'ra mono õ nherẽ, ta norĩ ma, 're to za'ra mono õ di za, 'Re ihâimana u'âsi mono hã. Duré ni'wam norĩ hã 'Re ihâimana u'âsi mono âma 're wata za'ra mono da, tipê'ẽ na 'rãwi itême 're sihutu mono da, te te sima 're wẽ za'ra mono wamhã, tô sena 're ihâimana mono na, te za te te 're saze za'ra a'â. Duré 'Re ihâimana u'âsi mono zô si 're isõpré mono norĩ ma, iwẽ na za te te ta norĩ ma iwa'ábã za'ra na, te za ta norĩ hã te te sina 're umnhasi u'âsi za'ra.

⁷ Nowé hã, 'Re ihâimana u'âsi mono si te te sina 're i'umnhasi mono zéb zarina, ma tô duré âma saze, ropipa hã za dazõ iwatobrozém na 'Re ihâimana u'âsi mono hã romhã ré te te âma ipore pu'uzém na, zahadu marĩ hã titõmo na te te 'madâ'â õ nherẽ, Nowé hã. Taha wa, isimiroti zarina ma tô uba're za'ene hã 'manha, ti'ra norĩ hã te te âma sõ'reptu za'ra da, timro zama, duré tisani'aba norĩ zama. Taha zarina, ma tô 'Re ihâimana u'âsi mono hã siwi da'awẽ'õ pese, dawasété na si 're dahâimana za'ra mono wa, Nowéhé si isimiroti hã te te 're 'madâ'â pese mono wa. Tawamhã Nowé hã, 'Re ihâimana u'âsi mono si te te sina 're umnhasi mono wa, ma tô 'Re ihâimana u'âsi mono hã âma tiwata, âne: “Ãhã si te 're timorĩ wẽ.” Ãne 'Re ihâimana u'âsi mono hã, Nowéhé âma iwatazé wasu'u hã.

⁸ Abra'ã hã, 'Re ihâimana u'âsi mono si te te sina 're i'umnhasi mono zéb zarina, ma tô duré isimiroti na saze, tirom nhiti watobro da, darob amoi u morĩ da, âma isa'ru da hã 'Re ihâimana u'âsi mono te te tâma ipisutu u. Tawamhã tirom hawi ma tô watobro tô, darob amoi u morĩ da, tamomomhã bådâdi hã te te waihu'u õ nherẽ. ⁹ 'Re ihâimana u'âsi mono si te te sina 're i'umnhasi mono zéb zarina, ma tô darob amoi âma 're sãmra Abra'ã hã, dasiré õ nherẽ, 'Re ihâimana u'âsi mono, za âma isa'ru da hã te te tâma ipisutuzéb âma. Tawamhã romhã 'manharĩ na 'ri wa, te oto 're sãmra, 'ri uptabi õ wa. Izati norĩ hã ma tô duré romhã 'manharĩ na 'ri wa, 're simasisi zahuré, Zacoho me. Ta norĩ ma, ma tô duré ropisutu zahuré, Abra'ãhã ma te te i'ropisutu ne, 'Re ihâimana u'âsi mono hã. ¹⁰ Abra'ã hã 'ri nho'u isi'utõrĩ'õ zô si ma tô 're simipari u'âsi, 'Re ihâimana u'âsi mono hã te te sima iwẽ na hãiwa âma te te dama i'ri zô si. Taha wa, te te siwi wẽ'õ õ di Abra'ã hã, romhã 'manharĩ na 'ri hã wasété wa, a'ã i're 're sãmra tõ mono da.

¹¹ Abra'ã hã 'Re ihâimana u'âsi mono si te te sina 're i'umnhasi mono zéb zarina, ma tô duré i'ra hã tâma podõ, si'ihĩ uptabi nherẽ,



*Romhâ 'manharĩ na 'ri
Ebreusi 11.9*

duré ãmro hã Sara hã préduptéb ré, 'ra waihu'u õ nherẽ. 'Re ãhãimana u'ãsi mono te te tãma ãropisutuzém na te te ãma sazei pese wa, ma tô ã'ra hã tãma podo tô. ¹² Abra'ã hã si'ĩhi uptabi wa, ãdã'ãzéb u romhutu nherẽ, ma tô ãhãiba hawi da'ahã uptabi na dasina dahã'ã u'ãsi, ãsihudu sidãpãsi. Wasi hã hãiwa na ahã uptabi na 're ãsimasa mono ne, ma tô da'ahã uptabi na atébré ni. ã zaihã na supara, ahã uptabi na 're ãsimi'wara mono ne, ma tô atébré ni.

¹³ ã norĩ hã 'Re ãhãimana u'ãsi mono te te sina 're umnhasi za'ra mono ré, 're dã'ã za'ra mono nherẽ, 'Re ãhãimana u'ãsi mono te te tãma ãropisutu za'ra zé hã te te sima 're waibui mono õ di ta norĩ hã, ti'ai ãma hãiba ré ré 're hãimana za'ra mono ré hã. Tane nherẽ, 'Re ãhãimana u'ãsi mono te te tãma ãropisutu za'ra zé hã romhã na uptabi na za te te tãma ãma ã'uwaimrami za'ra na, sena na te te 're waihu'u za'ra mono wa, ma tô ãma 're to za'ra ta norĩ hã, ti'ai ãma 're nomro mono ré. Ma tô duré sã'awi dama 're siwasu'u za'ra, ti'ai ãma dasiré 're ãhãimana uptabi za'ra mono õ na hã. ¹⁴ ãne na ta norĩ hã dama 're siwasu'u za'ra mono wamhã, daro hã aimawi ãtéb zô 're ãsõpré u'ãsi mono zé, te wama wasu'u za'ra, taha na si za oto 're ãrob uptabi za'ra mono na hã. ¹⁵ Tirob 'rata hawi 're ãwairébé mono na te te 're rosa'rata za'ra mono õ di, ta norĩ hã. Mare di. ãne 'wa'ãhã, ãté apã te aré ta norĩ hã tirob 'rata u 're nomro. ¹⁶ Tane nherẽ, daro ãwẽ uptabi zô si ma tô ta norĩ hã sima 're sãpré, hãiwa ãma sô 're ãhãimana za'ra mono zô si, ãwa 're ãsi'ubumroi u'ãsi

mono zéb da hã. Taha wa, 'Re ìhâimana u'âsi mono te te siwi wê'ô za'ra ô di, tinhib'apito na te te 're sisi za'ra mono tõe da hã. Taha zarina, ma tõe oto tõe 'ri nho'u hã ìwê uptabi hã tãma 'manharĩ za'ra, ìwa 're ìsi'ubumroi u'âsi mono zéb da hã, tirop téb ãma.

17-18 Abra'ã hã 'Re ìhâimana u'âsi mono si te te sina 're ì'umnhasi mono zéb zarina, ma tõe aré ti'ra hã tãma tĩwĩ Izati hã, tãma ãma ìsõprubzéb da, 'Re ìhâimana u'âsi mono hã te te pibui wamhã. Taha ô ré, ma tõe 'Re ìhâimana u'âsi mono hã tãma ropisutu siro, Abra'ãhã ma hã, ãne:

“Ai'ra Izatihi hawip si, te za asihudu norĩ hã ahã uptabi na 're hâimana za'ra, asihudu sidâpâsi te aima ìropisutuzéb zarina.”

Ãne na 'Re ìhâimana u'âsi mono te te tãma ropisutu nherẽ, ma tõe aré Abra'ã hã ti'ra hã tĩwĩ Izati hã, ì'ra si'aibã hã misi tãma poto nherẽ. Duré ta hawip si za ìsihudu norĩ hã sitébré da nherẽ, ma tõe aré tãma tĩwĩ, 'Re ìhâimana u'âsi mono ma hã. 19 Abra'ã hã ãne ma tõe sima rosa'rata: “'Re ìhâimana u'âsi mono ma si, waihu'u pese di, 're dadã'ã za'ra mono nherẽ, apã te te 're ìda'ahãiwa'utu mono da hã. Taha wa, ì'ra hã te aré tãma ìwĩrĩ hã, te te duré waihu'u pese di, apã te te ìma ìhãiwa'utu da hã, te te ìma ìropisutuzém na te te ìma ãma uwaimrami da hã.” Ãne ma tõe sima rosa'rata, Abra'ã hã. Tawamhã, ì'ra Izati hã dã'ã uptabi ô nherẽ, aré dã'ã wa, apã te te tãma ìhãiwa'utu ne, ma tõe dã'ã ãna tãma tisõ apã, 'Re ìhâimana u'âsi mono hã.

20 Duré Izati hã 'Re ìhâimana u'âsi mono si te te sina 're ì'umnhasi mono zéb zarina, ma tõe ti'ra norĩ ãma rowaptẽ tiwi, ìwê na si te te 're pawaptob u'âsi zahuré mono da, duré ìwê si te te tãma 're pisutu zahuré mono da, Zaco norĩ ma hã Eza'uhu me.

21 Duré Zaco hã 'Re ìhâimana u'âsi mono si te te sina 're ì'umnhasi mono zéb zarina, ma tõe Zuzéhé 'ra norĩ ma rowaptẽ 'Re ìhâimana u'âsi mono wi, ìwê na si te te 're pawaptob u'âsi zahuré mono da, duré ìwê si te te tãma 're pisutu zahuré mono da. Taha zarina, ma tõe duré tisiwazusizém na si'upari sina ãma tiwata, 'Re ìhâimana u'âsi mono ãma, Zaco hã.

22 Duré Zuzé hã 'Re ìhâimana u'âsi mono si te te sina 're ì'umnhasi mono zéb zarina, ma tõe tidã'ázéb u tidub'rata norĩ ma rowaihu'u sirõmo za'ra, Izarazéhé nhihudu norĩ, za Ezitu hawi ìwairébézém na hã. Ãne na, 'Re ìhâimana u'âsi mono si te te sina 're umnhasi mono wa, te duré tãma sina roti za'ra, ì'uĩrĩ na si, ìhi hã te te siwi ãri da apã, tirop 'rata u, tamep si te te siwi sêrẽ da.

23 Duré Mozésihi mama norĩ hã, 'Re ìhâimana u'âsi mono si te te sina 're ì'umnhasi zahuré mono zéb zarina, ma tõe dawí simi'uri zahuré Mozési hã, 'watébrémi na tãma poto zahuré wa. Duré tãma 'madã'ã

ze zahuré wa, tãma sawi uptabi zahuré di. Taha wa, ma dawí simi'uri zahuré. A'amo hã si'ubdatõ ma tô ãma ai'utõ, te te dawí ïsimi'uri zahuré zém na hã. Apito ma, ta norĩ hã pahí zahuré õ di, 'watébrémi na 're ïpoto za'ra mono norĩ hã, te te dama 're a'rui mono nherẽ. ãne ma tô 'manharĩ zahuré Mozésihi mama norĩ hã, 'Re ïhâimana u'âsi mono si te te sina 're umnhasi zahuré mono wa, duré ta norĩ hã.

24 Mozési hã prédu wamhã, 'Re ïhâimana u'âsi mono si te te sina 're ïumnhasi mono zéb zarina, ma tô dawí sisawi, Ezitu ãma apito Para'oho 'ra sipi'õí 'ra na da te dasima 're wasu'u za'ra mono tõi da, pi'õ te te ïprédum na hã. 25 Apito Para'oho nhorõwa ãma, uburé marĩ ïwasédé hã te te a'â dame 're ï'ab'manharĩ mono da hã, te te sima wẽ õ di Mozési hã, taha na si wẽ uptabi newa ãma 're ïtoi mono da hã. 'Re ïhâimana u'âsi mono nhíb'a'uwẽ norĩ siré, te te 're ïrobzépata mono da si, ma tô sima wẽ. 26 Apito Para'oho nhorõwa ãma 're sãmra u'âsi mono 'wa'âhã, te aré marĩ ïwa'âbã za'ëté na tinhibro pese, Ezitu ãma uburé marĩ hã ïwa'âbã za'êne hã 're ïsimi'wara mono na. Ta hã marĩ wa'âbã za'ëté mono hã wẽ nherẽ, taha upana marĩ ïwẽ uptabi si ma tô sima wẽ, Mozési hã. Danho'reptui'wa da, 'Re ïhâimana u'âsi mono te te ïpisutu ma si, te te 're robzépata mono da si, ma tô sima wẽ. ïwẽ hã 'Re ïhâimana u'âsi mono, niwa za te te tãma ïsõmri na si, ma tô te te ãma 're rosa'rata u'âsi, Mozési hã.

27 'Re ïhâimana u'âsi mono si te te sina 're ïumnhasi mono zéb zarina, ma tô duré Mozési hã watobro Ezitu hawi, apito Para'o hã te te sima simimnhasi ãna. 'Re ïhâimana u'âsi mono hã datõmo na da te 're 'madâ'â waihu'u za'ra mono õ nherẽ, Mozési hã titõmo na te te 're ï'madâ'â mono na ne, te te sina 're umnhasi mono wa, apã sipi'rai õ di, Ezitu u hã. Õne haré ma tô ta hawi watobro, siptete sina. 28 Mozési hã 'Re ïhâimana u'âsi mono si te te sina 're ïumnhasi mono zéb zarina, ma tô duré Pascowa na dato hã te te 're ï'manharĩ za'ra mono zéb da na tãma roti za'ra Izarazéhé nhihudu norĩ ma hã, ta norĩ hã tisai 'manharĩ na te te ãma sãna'rata za'ra da, 'Re ïhâimana u'âsi mono hã Mozésihi ma te te ïpisutuzéb zarina. 'Re ïhâimana u'âsi mono si te te sina 're ïumnhasi mono zéb zarina, ma tô duré Mozési hã tãma roti za'ra Izarazéhé nhihudu norĩ ma hã, tinhimizama wapru na 'ridawa zada'ré hã te te ãma sapré za'ra mono da, hãíwa ãma romhuri'wa hã Dapãri'wa na ïwaptērẽ hã, aibã tãma 're ïpoto'rata za'ra mono hã te te tiwi simroi mono tõi da, Izarazéhé nhihudu norĩ wi hã.

29 Duré Izarazéhé nhihudu norĩ hã, 'Re ïhâimana u'âsi mono si te te sina 're ïumnhasi za'ra mono zéb zarina, ma tô ã poré na saprĩ za'ra, zara u, ã pré na ã poré nhisi na. ã ré na da te 're ïsaprĩ za'ra mono ne, ma tô rob'ré na saprĩ za'ra, ã zada'ré amoi u hã, zara u.

Tane nherẽ, ezipsiu norĩ hã rob're na dazarina te te aré saprĩ za'ra da, si'aba'reí wamhã, ma tô â hã apâ ãré atob za'ra. Taha wa, ezipsiu norĩ hã â poré na ma tô uburé ai'utõ.

30 Duré Izarazéhé nhihudu norĩ hã, Zerico na 'ri nho'õmo nhisi ãma 'ri 'wawi wa'ra rãihã hã ma tô nasi te te uirĩ za'ra, sime da, 'Re ãhãimana u'ãsi mono te te tãma ãpisutu za'ra zéb zarina. Bãdã hã 7 na ma tô ãma ai'utõrĩ za'ra, te te nasi siwi uirĩ za'ra mono ré hã. Tawamhã 'ri 'wawi wa'ra rãihã hã ma tô aime. Ta norĩ hã 'Re ãhãimana u'ãsi mono si te te sina 're ã'umnhasi za'ra mono zéb zarina, ma tô aime. **31** Duré Ra'abi hã pi'õ aré 're ãhãimana wasété mono hã, 'Re ãhãimana u'ãsi mono si te te sina 're ã'umnhasi mono zéb zarina, ma tô wapsã'a'wa norĩ hã tinhorõwa u 'mazasi wẽ zahuré, ti'ai wẽ zõ pi'uriwi dama robzabui'wa norĩ hã. Taha wa, 'Re ãhãimana u'ãsi mono hã te te dazu wĩrĩ õ di Ra'abi hã, 'ri nho'õmo ãma uburé 'Re ãhãimana u'ãsi mono nhimiroti 'madã'ã'õ'wa norĩ zu hã.

32 ãne na 'Re ãhãimana u'ãsi mono si, da te dasina 're ã'umnhasi za'ra mono zém na, ahã uptabi na te ãma aima rob'rãzarõtõ za'ra wa'aba neza. ãhã wamhã, ãnhimirob'rãzarõno hã te aré sina tipahã. E marĩ wa. Ahã uptabi wa. Ahã uptabi di tô, 'Re ãhãimana u'ãsi mono te te sina 're ã'umnhasi za'ra mono norĩ hã, zahadu te ãma aima ãrowasu'u za'ra wa'aba õ hã: Zidi'ã hã, duré Barati, duré Sãsã, duré Zepté, duré Dawi, duré Samuwé, duré aimawi norĩ hã uburé 'Re ãhãimana u'ãsi mono zadawa wasu'u 'rata 'wa 're ãhãimana za'ra mono norĩ hã. **33** Ta norĩ hã 'Re ãhãimana u'ãsi mono si te te sina 're ã'umnhasi za'ra mono zéb zarina, ma tô te te da'ãma 're ai'uté za'ra, 'Re ãhãimana u'ãsi mono zadawa para, daro hã te te dawu 're waibui mono da. Ta norĩ hã ãwẽ si te te 're 'manharĩ u'ãsi za'ra mono wa, ma tô ãwẽ uptabi hã te te sima 're waibu, 'Re ãhãimana u'ãsi mono te te tãma ãropisutu za'ra zéb zarina. Duré hu'u zérépa hã ma tô te te 're sadai're nhitob za'ra tinhib'rata na, te te 're simro tõ mono da. **34** Ta norĩ hã ma tô duré unhama ro'o za'ene hã te te 're simro, siwi. Ma tô duré dawu 're sisõ'reptu za'ra, sib'ézẽ 'wapa na da te 're simroi mono da nherẽ. Sib'uwere na 're hãimana za'ra mono nherẽ, 'Re ãhãimana u'ãsi mono nhimipawaptobzém na ma tô siptete na dazada 're hãimana za'ra. Siptete uptabi na te te 're da'wapé za'ra mono wa, ma tô ta norĩ hã tizahui'wa norĩ hã te te 're wano'õ apã, darob amoi hawi dazahui'wa norĩ hã. **35** Duré pi'õ norĩ wi, aré tiwi 're ãdã'ã za'ra mono norĩ hã, ma tô apã tãma 're hãiwa'utu za'ra, pi'õ norĩ ma. Duré ta norĩ hã 'Re ãhãimana u'ãsi mono si te te sina 're ã'umnhasi za'ra mono norĩ hã dazazéb 're, 're hãimana za'ra mono ré, 'Re ãhãimana u'ãsi mono te te dawu 're udã za'ra mono 'wa'ãhã, taha zarina te aré dazazém hawi da te tãma 're rob'ru za'ra, ta hawi 're wairébé mono da. Tane nherẽ, ta norĩ hã 'Re ãhãimana u'ãsi

mono te te dawi 're udâ waihu'u za'ra mono õ di. Taha wa, ma tô danhimirob'manharĩ wasété na 're si'utõrĩ. Rowẽ uptabi na 're ãdanomro u'âsi mono zéb u hã, 'Re ãhâimana u'âsi mono si te te 're hãiwa'utu za'ra mono da, ma tô ãne zõ si 're si'madã'ã za'ra, ta norĩ hã. **36** Ni'wam norĩ ãma, ma tô duré 're dawa'ẽ za'ra. Powawẽ hãiwarẽ 'manharĩ na ma tô da te dasiwi 're hã za'ra duré. Ni'wam norĩ hã ma tô da te 're pawasisi za'ra, ãsi'uwazi nhorõ rutu na, dazazéb 're, da te 're séme mono da. **37** Ni'wam norĩ hã ma tô duré êtẽ tõmo wawẽ na da te 're simro. Ni'wam norĩ hã ma tô duré ãhãiba wãiwa ãma 're dasiwã za'ra, wede'ézém na ne. Sib'ézé 'wapa na ma tô duré da te 're simro. Pone'ẽrebãi hã na si ma tô duré ni'wam norĩ hã 're si'uza za'ra. Sibrob ãna ma tô duré ta norĩ hã 're hãimana za'ra. Danhimirob'manharĩ wasété na ma tô duré ni'wam norĩ hã te te 're robzépata za'ra, da te 're ruiwapari za'ra mono wa. ãne 'Re ãhâimana u'âsi mono si te te sina 're ã'umnhasi za'ra mono norĩ wasu'u 'rãzarõno hã. **38** Ta norĩ hã hãiwi si ma tô 're nomro a'ubuni wi, êtẽ 'rãihã u zama. Duré êtẽ 'rãihã zahãpã êtẽ're wa, ma tô duré dawi 're si'ubumro, ab're wab zama. Ta norĩ si ma tô 'Re ãhâimana u'âsi mono ma 're hãimana wẽ za'ra.

39 Ta norĩ ãma si ma tô 'Re ãhâimana u'âsi mono hã 're wata za'ra uburé, õhõ si te te sina 're umnhasi za'ra mono wa. 'Re ãhâimana u'âsi mono te te tãma ãropisutu za'ra zéb zarina, ãwẽ uptabi hã ti'ab ré te te sima 're waibui mono õ nherẽ, ma tô te te sina 're umnhasi u'âsi za'ra, 're ãsi'utõrĩ za'ra mono zéb u. **40** 'Re ãhâimana u'âsi mono hã ãwẽ uptabi hã niwamhã za te te wama ãsõmri za'ra na, te te sima wa'ãma roti sirõmo za'ra wa, ti'ab ré ta norĩ hã te te sima waibui õ di tô, 'Re ãhâimana u'âsi mono te te tãma ãropisutu za'ra zé hã. Uburé wasiré si te za rowẽ uptabi na ã'rata 're ãhâimana u'âsi za'ra mono zé hã sima waibu za'ra, ta norĩ hã.

'Re ãhâimana u'âsi mono hã ti'ai ãma damama ne te te 're ãda'ahã za'ra mono zé wasu'u

12 ¹ Duréihã ni'wam norĩ hã 'Re ãhâimana u'âsi mono te te sina 're ã'umnhasi za'ra mono zéb zarina, danho'a 're ãnomro wẽ mono norĩ hã ahã uptabi na 'rãwi wamana wawi 're ãsimasab u'âsi mono ne, wa za ta norĩ ãma 're wasipo're pu'u u'âsi za'ra. Taha wa, wa za uburé marĩ ãwasédé hã wa te wasiwi 're wẽ'õ pese za'ra, 're ãwanomro wẽ mono zé wi, te te 're wanhowada za'ra mono tõ da, te te 're ãwawasutu u'âsi za'ra mono hã, wawasédé hã. Dawara na 're dasipibu za'ra mono wa, dahãiba wapu na 're dasisa'rei mono da, marĩ ãpire hã dahãiba na dama 're ãhâimana za'ra mono hã da te dasisa 're ãsani za'ra mono ne, wa za wawasédé hã wa te wasiwi 're wẽ'õ pese za'ra. Tawamhã wanhiptete na wa za tô ãma 're

wahâimana za'ra Cristuhu âma si, tiwi 're wasipizari za'ra mono âna. Dawara na 're dasipibu za'ra mono wamhã, dawara tete haré dasiwi 're idasisa'rei mono ne, wa za tô wanhiptete na âma 're wahâimana u'âsi za'ra, Cristuhu âma si. ²Dawara na 're dasipibu za'ra mono wa, dawara, da te 're ï'râsutu za'ra mono zéb u si, da te 're ïrob'madâ'â za'ra mono ne, wa za Zezusihi âma si wa te wasina 're rosa'rata u'âsi za'ra. Ta hã Zezusi hã ma tô ïsãna'rata hawimhã te te 're wa'apawapto, 'Re ïhâimana u'âsi mono si wa te wasina 're umnhasi u'âsi za'ra mono da. Tane te za duré te te 're wa'apawapto u'âsi, 're ïwadâ'â za'ra mono zéb u, ôhõ si wa te wasina 're umnhasi u'âsi za'ra mono da, tiwi 're wasipizari za'ra mono âna. Ta hã Cristu hã sihâiba zawi õ di, wedepo'o nhonhi'râmi na dazada dâ'â tõ da hã, wedepo'o nhonhi'râmi hã dazada 're ïhâimana wasété za'ra mono norĩ pãrízep si nherê. Taha wa'râmi, hâiwa âma to sina 're ïhâimana u'âsi mono zé hã za tâma 're ïhâimana mono na, te te sina waihu'u sirõmo wa, taha wa, sihâiba zawi õ di tô, wedepo'o nhonhi'râmi na dazada dâ'â tõ da hã. Âhãna hã 'Re ïhâimana u'âsi mono nhimire niwĩ, te oto pire uptabi na 're sãmra, ïsiré'râwi te te 're da'ab'madâ'â u'âsi mono da oto.

³Ma'ãpé âma rosa'rata pese za'ra wa'aba, Zezusi hã ti'ab ré te te 're ïrobzépata mono na hã. Tiwasété si te te 're ï'manharĩ za'ra mono norĩ hã te te 're 'ruiwaparĩ za'ra mono wa, te te tâma 're ïrob'manharĩ wasété za'ra mono zém na, ma tô te te 're robzépata za'ëtê, Zezusi hã. Tane nherê, siptete u'âsi ma tô 're hâimana. Tane duré a norĩ wa'wa hã te za marĩ ïwasété wi 're asi'madâ'â pese za'ra wa'aba mo, asiptete sina 're aihâimana za'ra wa'aba mono da, aiwi 're robzei'õ za'ra wa'aba mono tõ da. Taha zarina, 'Re ïhâimana u'âsi mono hã asina 're ï'umnhasi za'ra wa'aba mono zé hã aiwi 're si'utõrĩ za'ra wa'aba mono tõ da, te za tô asiptete sina 're aihâimana za'ra wa'aba mo. ⁴Dawasété nhiptete da, asiptete sina 're aihâimana za'ra wa'aba mono nherê, zahadu ai'matâ'â aba õ di, da te aima ï'mairob'manharĩ za'ëtê aba na hã, Zezusi ïdâ'â ne hã. ⁵E ma tô bété âma aipo're si'ãri za'ra wa'wa, 'Re ïhâimana u'âsi mono hã te te aima ïroti za'ra wa'aba zém na hã, duré ti'ra na te te aima ïnharĩ za'ra wa'aba zém na hã. Âne ma tô âhã wasu'u na ni'wa hã âma rob'ui'éré, duréihã:

“A norĩ wa'wa hã ï'ra na ï'ma 're aihâimana za'ra wa'aba mono nherê, aiwasédé hã 're ï'manharĩ za'ra wa'aba mono zém na 're asisãmri za'ra wa'aba mono da, wa hã Danhib'apito uptabi hã te 're aihã za'ra wa'aba mono wamhã, ï'ãma 're rosa'rata upa za'ra wa'aba mono õ di za, taré newa. Duré apã 're anomro wê wa'aba mono da, niha te aima 're rob'manharĩ za'ra wa'aba mono wamhã, aiwi 're robzei'õ

za'ra wa'aba mono õ di za. Te za ãma asima 're ãrosa'rata wẽ u'âsi za'ra wa'aba mo.

6 E marĩ wa, aiwi 're robzei'õ za'ra wa'aba mono õ di za. Wa hã Danhib'apito uptabi hã uburé te 're ãzawi pese mono norĩ hã te 're ahã za'ra mono wa. Duré tiwasété na 'rãwi 're sisãmri za'ra mono da, uburé ãra na te 're ãsisi za'ra mono norĩ hã apã 're nomro wẽ mono da, wa wa hã te tãma 're arob'manharĩ, ta norĩ ma hã.”

Ãne wa, aiwi 're robzei'õ za'ra wa'aba mono õ di za, 'Re ãhãmãna u'âsi mono te te 're aihã za'ra wa'aba mono wamhã.

7 Damama norĩ hã bété. E ti'ra norĩ hã te te 're hã za'ra mono õ di za, po're ãna 're hãmãna za'ra mono wamhã. Te za tô te te 're hã za'ra. Tane te duré Aimama 'wa hã 'Re ãhãmãna u'âsi mono hã te te 're aihã za'ra wa'wa. E marĩ wa. ãra si tãma 're aihãmãna za'ra wa'aba mono wa oto. Taha wa, marĩ na 're robzépata za'ra wa'aba mono nherẽ, te za sada 're asiptete za'ra wa'aba mo, aiwi 're robzei'õ za'ra wa'aba mono ãna. 'Re ãhãmãna u'âsi mono 'ra si, oto tãma 're aihãmãna za'ra wa'aba mono wa, te te 're ãaihã za'ra wa'aba mono zém na asina 're waihu'u pese za'ra wa'aba mono wa, te za sada 're asiptete za'ra wa'aba mo. **8** Uburé te tô ti'ra norĩ hã te te 're ahã za'ra 'Re ãhãmãna u'âsi mono hã, tiwasédé hã te te 're ãmanharĩ za'ra mono zém na ãma 're siwaihu'u za'ra mono da oto, ta norĩ hã. Taha wa, te te 're ai'mai'ahãri aba mono õ wamhã, ãra'õ na te za 'rãwi 're ai'masiwaihu'u aba mo. Ãne wamhã, ni'wa hã mama õ wa, da te 're ãahãri mono õ ne, 're ai'maihãmãna aba mono na te za 'rãwi 're ai'masiwaihu'u aba mo, sena na ãra na tãma 're ai'maihãmãna aba mono õ na hã. **9** Ti'ai ãma wamama uptabi norĩ hã wawasété na 'rãwi 're wasiwaihu'u za'ra mono da, wanhimiza'rese wi te te 're wahã za'ra mono wamhã, wa tô ta norĩ hã wa te 're hãmãna wazéb za'ra, wama pire na 're hãmãna za'ra mono wa. Taha nhipai u, wa za duré hãiwa ãma Wamama uptabi hã wa te 're wapari pese za'ra, te te 're wa'ahã za'ra mono nherẽ, rowẽ na õhõ ãma si 're wanomro u'âsi mono da oto. **10** Ti'ai ãma wamama uptabi norĩ hã ma tô wanhimiza'rese wi te te 're wa'ahã za'ra tô, 're waprédub za'ra mono õ ré hã. Wawasété na 'rãwi 're wasiwaihu'u za'ra mono da, ma tô te te 're wa'ahã za'ra, niwamhã ãuwaibaba uptabi õ nherẽ, damama norĩ nhimi'ahãrizé hã. Tazahã, 'Re ãhãmãna u'âsi mono si, te ãuwaibaba si te te 're wa'ahã za'ra. Te te 're ãwa'apawapto mono da si, te za tô ti'ai ãma 're wanomro mono ré, te te 're wa'ahã za'ra, wawasété ãna ãsine 're wahãmãna za'ra mono da oto, wa norĩ hã. **11** Wawasédé hã wa te 're ãmanharĩ za'ra mono zém na 'rãwi 're wasiwaihu'u za'ra mono da, 'Re ãhãmãna u'âsi mono te te 're wahã za'ra mono wamhã, awa'awi 're watoi waihu'u za'ra mono õ di, taha

na hã. Robzei'õ na si wa za a'â 're wahâimana za'ra. Tane nherê, 'Re îhâimana u'âsi mono te te 're îwahâ za'ra mono zém na oto 'râwi 're wasiwaihu'u za'ra mono wamhã, duré wa'âma 're ronomro pese za'ra mono wapsi, te za wapê hã î're wama 're simi'wara wê oto, õhõ âma si 're îwanomro wê mono zéb zarina wa.

'Re îhâimana u'âsi mono mreme, da te 're îwapari pese za'ra mono zé wasu'u

12 Taha wa, marĩ na 're robzépata za'ra wa'aba mono wamhã, aipê'ê wê zarina te za asiptete sina âma 're aihâimana za'ra wa'aba mo, 'Re îhâimana u'âsi mono âma si, aiwi 're robzei'õ pese za'ra wa'aba mono wa, tiwi asina 're aipahâ za'ra wa'aba mono tõ da. 13 Bâdâdi na awa'awi u'âsi 're îdanomro mono ne, te za Cristuhu nhirã zarina si awa'awi 're anomro u'âsi aba mo, îwê na si. Âne wamhã, î'râtêire hã morĩ wasété na 're îmorĩ ne, ni'wam norĩ hã Cristuhu âma sib'uware na 're îhâimana za'ra mono norĩ hã asine wa'aba, awa'awi u'âsi 're nomro wê mono wamhã, ta norĩ hã tiwasété na 're si'marõpãrĩ zahu za'ra mono õ di za oto. Apâ te za ai'âma 're siptete za'ra wa'wa, îsazei uptabi 'wa na 're î'aihâimana za'ra wa'aba mono zém na hã.

14 Rowê zô te za 're asõpré wa'aba mo, dasiré 're aihâimana za'ra wa'aba mono da. Duré 'Re îhâimana u'âsi mono ma si 're asisõmri u'âsi za'ra wa'aba mono da, te za 're asi'madâ'â pese za'ra wa'aba mo. Âne hã ni'wam norĩ hã 're hâimana wê za'ra mono õ nherê, niwamhã Wanhib'apito hã titõmo na te te dame 'madâ'â za'ra õ di za, ta norĩ hã. 15 'Re aihâimana za'ra wa'aba mono zém na, 'Re îhâimana u'âsi mono ma, asina âma 're uwaimrami za'ra wa'aba mono õ wa, tinhoprubzéb zarina, îwê uptabi hã te te aima 're îpisutu za'ra wa'aba mono hã 're simini za'ra wa'aba mono tõ da, te za 're asi'madâ'â pese za'ra wa'aba mo. Wede pa hã, ti'ai 'rowi 're simi'wara mono ré hã, taha wa'uzé hã dama simimnhasi õ di. Tane nherê, îpa hã da te oto 're sa'o'o za'ra mono wa, da te oto 're huri mono wamhã, te za te te 're da'râiwamnarĩ za'ra, taha pa wa'u hã sé wa. Tane duré, a norĩ wa'wa hã te za ni'wam norĩ wi 're asi'madâ'â pese za'ra wa'aba mo, ta norĩ hã te te aiwi 're rowasété za'ra wa'aba mono tõ da, duré taha zarina a norĩ wa'wa hã 'râwi aiwasété na 're asi'uptob za'ra wa'aba mono tõ da, ta norĩ zu. 16 Duréihã Eza'u hã tâma mrab uptabi wa, ma tô tino nhipi hã tiwi waptê, Zacoho wi. Tawamhã ãmama ma îpoto'rata zarina, uburé marĩ hã ãmama te te tâma îpisudu hã, duré 'Re îhâimana u'âsi mono, îwê hã te te tâma îpisudu hã î'upana ãnoi ma 're hâimana mono da, ma tô tinoi ma ti'ru, îsipi wa'rãmi Eza'u hã, taha na sai õ ré. Âne hã Eza'u hã 're îhâimana wasété mono ne, te duré ni'wam norĩ hã asiré 're hâimana wasété za'ra wa'wa. Ta

norĩ wi, te za 're asi'madâ'â pese za'ra wa'aba mo, sina 're ïsipsaihuri za'ra mono norĩ wi, 'Re ïhâimana u'âsi mono hâimanazé te te 're ïwazéb za'ra mono õ norĩ wi hã. 17 Tawamhã taha na ãma ronomro parip si, ma tô Eza'u hã timama ma tinha, 'Re ïhâimana u'âsi mono ma, ãma mreme da, ïwê hã te te tãma 're anhomri mono da, ïnoi upana. Tane nherê, ma tô ïmama hã siwi wê'õ, ãma mreme tõ da. Taha wa, tiwasédé te te 'manharĩ pari nherê, apâ te te sima pari waihu'u õ di, timama ma te te nharĩ sina, wawa 'rãihã na wawa nherê. ãhã wasu'u hã aima waihu'u pese za'ra wa'aba di, ãne na hã.

18 Duréihã Izarazéhé nhihudu norĩ hã ma tô Sina'i na êtê 'rãihã nhisi u sina rotété za'ra, tame ï'rata si'ubumro da a'â, 'Re ïhâimana u'âsi mono 'rata. Ta hã êtê 'rãihã hã danhib'rata na da te upi waihu'u pese di. Tane nherê, a norĩ wa'wa hã tane 're aihâimana za'ra wa'aba mono õ di oto, ãhãna hã. 'Re ïhâimana u'âsi mono u, aipê'ê na 'rãwi ïtême 're aihutu aba mono wamhã, marĩ hã asib'rata na 're upi waihu'u za'ra wa'aba mono õ di za. Izarazéhé nhihudu norĩ si ma tô 'rãwi unhama ro'õ za'ene hã 'madâ'â za'ra, êtê 'rãihã nhisiwimhã. Tamemhã ma duré hãiwa nhirõtõ 'rãdã hã watobro, ï'rãdã'ara uptabi hã. Rowa'u'u za'êtê zama ma tô duré watobro, êtê 'rãihã nhisi ãma hã. ãne ma tô ta norĩ hã 'madâ'â za'ra titõmo na, Izarazéhé nhihudu norĩ hã. 19 Danhimnhihârâzé hã ïhârâ 'rãihã hã ma tô duré wapari za'ra. 'Re ïhâimana u'âsi mono mreme zama ma tô duré wapari za'ra, Izarazéhé nhihudu norĩ hã. Ta hã te te wapari za'ra wamhã, 'Re ïhâimana u'âsi mono hã niha te tãma rob'manharĩ za'ra õ'umnhasite, ma tô sima wê za'ra, Mozésihi ma si te te rowaihu'u mono da, 'Re ïhâimana u'âsi mono hã, hãiba pisutu. 20 E marĩ wa, ma tô ta norĩ hã 'Re ïhâimana u'âsi mono ma tipahi za'ra, Izarazéhé nhihudu norĩ hã. 'Re ïhâimana u'âsi mono hã ma tô êtê 'rãihã hãiba na tãma roti za'ra, ãne: "Ni'wa hã ã êtê 'rãihã hã te te upi wamhã, te za asiwi ïwĩrĩ 'wa, êtê na. Asimizama aba zama, te te sina 'mai'upi wamhã, te za ïwĩrĩ 'wa, êtê na." ãne ma tô êtê 'rãihã hãiba na ta norĩ ma mreme pire na tãma roti za'ra aré, 'Re ïhâimana u'âsi mono hã. Taha pipa te, ma tô Izarazéhé nhihudu norĩ hã sima wê za'ra, Mozésihi ma si, hãiba pisutu te te rowaihu'u mono da, 'Re ïhâimana u'âsi mono hã, taha ma si. 21 ã hã te te ï'madâ'â za'ra hã pipa uptabi wa, te Mozési hã 'rãwi sima tinha, ãne: "Ïpahi wa, wa tãma rêrê." ãne te sima tinha, Mozési hã. ãne ma tô ropipa uptabi hã êtê 'rãihã ãma ïs'õ'a ïwatobro za'ra hã 'madâ'â za'ra duréihã, Izarazéhé nhihudu norĩ hã, 'Re ïhâimana u'âsi mono u te te sina rotété za'ra wamhã.

22 Tazahã, a norĩ wa'wa hã tane 're aihâimana za'ra wa'aba mono õ di oto, ãhãna hã. 'Re ïhâimana u'âsi mono u aipê'ê na 'rãwi 're rob'umhutu za'ra wa'aba mono wamhã, hãiwa ãma Si'ã na êtê

'râihâ nhisi u ne, ma tô 're ãrob'umhutu za'ra wa'aba mo. Duré hâiwa âma Zeruzarê hã 'ri nho'ômo u ne, ma tô 're ãrob'umhutu za'ra wa'aba mo, 'Re ãhâimana u'âsi mono 're ãsâmra u'âsi mono zêb u hã, hâiwa âma tâma ãromhuri'wa norĩ hã ahâ uptabi na, ãrata 're ãsi'ubumroi mono zêb u zama. ²³ Tame te oto 'Re ãhâimana u'âsi mono nhib'a'uwê norĩ hã to sina 're si'rã'ôtô, aibâ hã dama 're potô 'rata za'ra mono wa, dama ãsawi pese ne, 'Re ãhâimana u'âsi mono te te 're ãazawi pese mono norĩ hã, hâiwa âma sisi ui'ééré ré 're ãhâimana za'ra mono norĩ hã. Tamomo ma tô ãtême 're ãrob'umhutu za'ra wa'aba mo, dahâimanazém na ã'uwaibaba si te te 're ãda'awaihu'u mono zêb zarina, dama rowairébé'wai u hã. Duré ti'ai âma ré ãwê si te te 're ãmanharĩ za'ra mono norĩ hã 're ãhâimana za'ra mono zêb u, ma tô duré 're ãrob'umhutu za'ra wa'aba mo, 'Re ãhâimana u'âsi mono te te tâma 're ãwê za'ra mono zêb zarina si, rowê uptabi na oto 're ãhâimana za'ra mono norĩ u hã. ²⁴ Zezusihi u ma tô duré 're ãrob'umhutu za'ra wa'aba mo. Ta hã te oto 'Re ãhâimana u'âsi mono te te dama ãropisutuzép té hã te te wa'âma 're ab'madâ'â u'âsi. Duréihã Ca'ĩ hã tino te te wĩrĩ wa, ãwapru hã tiwi pu'u wamhã, 'Re ãhâimana u'âsi mono te te ãruiwa'âbâzé, te wasu'u, Abéhé wapru hã. Tanei ô di, Zezusihi wapru hã. Dazada dâ'â wa, ãwapru hã tiwi pu'u wamhã, 'Re ãhâimana u'âsi mono hã dawasédé te te dama 're ãapari mono zé, te wasu'u, Zezusihi wapru hã.

²⁵ Taha wa, te za 're asi'madâ'â pese za'ra wa'aba mo, 'Re ãhâimana u'âsi mono hã te te aima 're rowasu'u za'ra wa'aba mono wamhã, tiwi 're asipo're nhitob za'ra wa'aba mono tã da. Duréihã Sina'i na êtê 'râihâ nhisi âma, 'Re ãhâimana u'âsi mono hã ti'ai u te te we dama rowasu'u wamhã, ãsimiroti wapari'ô'wa norĩ hã wairébé ô di, te te ãdahâ za'ra zé wi hã. Wa norĩ hã bété. E 'Re ãhâimana u'âsi mono hã hâiwa hawi te te wei wama 're aroti wê mono nherê, tiwi 're wasipizari za'ra mono wamhã, e ãsimihâzé wi wasi'uihã na 're wawairébé mono da bâ, wa za wanhimipari âna 're wanomro u'âsi bété. ²⁶ Duréihã 'Re ãhâimana u'âsi mono hã Sina'i na êtê 'râihâ nhisi âma te te dama roti wamhã, ma tô ti'a hã sãsã'ã. Tane nherê, taha za'u hã ma tô oto dama ropisutu, âne: "Ti'a hã niwapsi wa za duré sãsã'ã, ãrême ma. Tawamhã, ti'a si te sãsã'ã ô di za oto. Hâiwa nhirôtô zama, wa za ãsu sãsã'ã, nimahã na hã." Âne 'Re ãhâimana u'âsi mono te te dama ãropisutuzép tém na rob'ui'ééré hã. ²⁷ E marĩ te tawamhã wama wasu'u za'ra ãmreme hã, "ãrême ma" na hã. Uburé marĩ hã ti'ai âma, 'Re ãhâimana u'âsi mono nhimipodo hã nimahã na te te sãsã'ã za'ra wa, za ãsi'utôrĩ mono zé, te wama wasu'u za'ra. Tawamhã taha nhowa're're, te za ãwê uptabi hã da te oto ãsãsã'ã waihu'u'ô hã 're hâimana u'âsi za'ra hâiwa âma, ãsi'utôrĩ waihu'u'ô hã.

28 'Re ìhâimana u'âsi mono hã 'râwi te te 're wa'ab'madâ'â mono da, ì'rata 're ìwahâimana u'âsi za'ra mono zéb da hã, ma tô te te wama 're apisutu, da te wawi âma ì'ai'uté waihu'u za'ra ô hã. Taha wa, wa za 'Re ìhâimana u'âsi mono âma 're wawata u'âsi za'ra, sôpru wa. Te te sima 're ìwa'awê mono zéb zarina, wa za âma 're wawata u'âsi za'ra, wa te wasiwi 're wazéb za'ra mono sina, wama 're toi u'âsi mono da. 29 'Re ìhâimana u'âsi mono hã Wanhib'apito za'ra hã ìpo're'ô norî hã te te uprosi waihu'u pese di, unhama ro'o za'êtê na marî hã 're ìsi'unhama pese mono ne hã. Taha wa, wa za tô wa norî hã ìmreme hã wa te 're wapari u'âsi za'ra, Wanhib'apito nhimiroti hã.

'Re ìhâimana u'âsi mono hã dama 're ìtoi mono zé wasu'u

13 ¹ Cristuhu âma si oto 're asisânawã za'ra wa'aba mono wa, te za a norî wa'wa hã ône u'âsi 're asisawî pese za'ra wa'aba mo oto. ² Darob amoi hawi atême 're dasihutu za'ra wa'aba mono wamhã, asôrôwa u, te za duré 're ìda'mazasi wê za'ra wa'aba mo. Ni'wam norî hã tinhorôwa u te te 're da'mazasi wê za'ra mono wamhã, hâiwa âma 'Re ìhâimana u'âsi mono ma romhuri'wa norî hã ma tô te te 're 'mazasi wê za'ra, tâma sa'rese za'ra ô nherê, hâiwa âma romhuri'wa norî hã. ³ Duré wasiré ìsazei'wa norî âma te za 're aipo're pu'u u'âsi za'ra wa'aba mo, dazazéb 're, 're ìsimasa mono norî âma hã, ta norî hã asiwi 're pawaptob za'ra wa'aba mono da. Dazazéb 're, ta norî siré 're aimasa wa'aba mono ne, te za âma 're aipo're pu'u u'âsi za'ra wa'aba mo. Duré marî na te te 're ìrobzépata za'ra mono norî âma zama, te za duré 're aipo're pu'u u'âsi za'ra wa'aba mo, ta norî siré 're ìrobzépata za'ra wa'aba mono ne.

⁴ Damro ré norî hâimanazé hã te za 're ìwazé pese za'ra wa'aba mo, 'Re ìhâimana u'âsi mono ma, pire uptabi wa. Aimro si te za asima 're ìmadâ'â u'âsi za'ra wa'aba mo. E marî wa. Ni'wam norî hã tihâiba na tiwasédé hã te te 're 'manharî za'ra mono wamhã, 'Re ìhâimana u'âsi mono hã te za ta norî hã te te 're hã za'ra. Duré ni'wam norî hã mro ré nherê, ìmro'ô na 're sipsaihuri za'ra mono wamhã, te za ta norî hã duré te te 're hã za'ra, 'Re ìhâimana u'âsi mono hã.

⁵ Rob'uiprazép si, asima 're sawi za'ra wa'aba mono ô di za. Asibro hã aima 're ìhâimana za'ra wa'aba mono nhipai u, marî zô 're rob'ruiwapari zahu za'ra wa'aba mono ô di za. Duréihã 'Re ìhâimana u'âsi mono hã ma tô âne dama sina ropisutu: "Ni'wamhã asiti za'ra wa'aba 're ìhâimana mono ô di za. Duré te airême waihu'u za'ra wa'aba ô di za." Âne te te dama sina ìropisutuzém na rob'ui'ére hã, ìbaihã na hã. ⁶ Taha wa, 'Re ìhâimana u'âsi mono hã wa te wasina 're ìumnhasi za'ra mono zéb zarina, wa za âne wa te

wasima 're nharĩ za'ra, duréihã apito Dawi hã te te sima ãnharĩ ne, ãne:

“Danhib'apito uptabi hã te te 're ãpawaptob u'âsi. Taha wa, ãsina 're ãpahi mono õ di, wa hã.

Ãne wamhã, e niha da te ãma rob'manharĩ da bã.”

Ãne duréihã Dawi hã 'rãwi te te sima ãnharĩ ne, wa za duré wa norĩ hã wa te wasima 're nharĩ za'ra, ãsine.

7 Ma'ãpé ãma asipo're pu'u za'ra wa'aba, 'Re ãhãimana u'âsi mono zadawa wasu'u na ãsãna'rata hawi te te ãma aima 're ãrowasu'u za'ra wa'aba mono norĩ ãma hã, ai'madã'ãwa za'ra wa'aba norĩ ãma hã. Ta norĩ 're ãhãimana za'ra mono zém na, duré 're ãdã'ã za'ra mono zém na zama, te za ãma 're asipo're pu'u u'âsi za'ra wa'aba mo. Ta norĩ hã 'Re ãhãimana u'âsi mono si te te sina 're ãumnhasi za'ra mono ne, te za duré a norĩ wa'wa hã ãsine asina 're ãumnhasi za'ra wa'aba mo, 'Re ãhãimana u'âsi mono hã. 8 Zezu Cristu hã tihãimanazém na hã te te ãma 're saprĩ waihu'u mono õ di. Õne u'âsi te tô misi haré ãma 're hãimana u'âsi, bãtã sidãpãsi. 9 Cristuhu wasu'uwẽ upana, danhimiroti aimawi na da'ãma 're sasõmri za'ra wa'aba mono õ di za, senai'õ na da te dasima 're ãrowasu'u za'ra mono na hã. 'Re ãhãimana u'âsi mono hã tinhoprubzéb zarina, ãwẽ uptabi hã te te wama 're ãapisutu mono na si, wa za wapẽ'ẽ 're ãma 're wanhiptete za'ra. Taha si wa norĩ hã wama ãwẽ uptabi za'ra hã. Dasa hã da te dasiwi 're ãsawi za'ra mono na roti hã da te 're ãmadã'ã za'ra mono na, ãma 're danhiptete waihu'u za'ra mono õ di, dapẽ'ẽ remhã. Mare di. E marĩ wa. Taré wa, dasa hã. Taha na ãma 're dasipawapto waihu'u za'ra mono õ di tô, dasa da te dasiwi 're ãsawi za'ra mono na roti na hã.

10 Duréihã 'Re ãhãimana u'âsi mono ma, da'ãma romhuri'wa norĩ hã, sasedoti norĩ hã dawasété parizéb da, danhimizama te te tãma 're simroi mono wamhã, ta norĩ hã ãnhi na hã 're saihuri waihu'u mono õ di. Tane duré, ni'wam norĩ hã danhimizama wapru na 'Re ãhãimana u'âsi mono hã dawasédé hã zahadu te te dama ãma 're apari mono newa, te za Cristu hã sada ãdã'ã za'ra zé hã ta norĩ hã te te 're simini za'ra. Wa norĩ si Cristuhu zazei'wa norĩ si, wa za wa te wasina ãma 're uwaimrami za'ra, wazada ãdã'ã za'ra zém na hã. 11 Sasedoti norĩ nhib'apito, tisiré norĩ ma ãpire uptabi si wahub sidãpãsi ma tô danhimizama wapru rí ãtème 're sisisi, 'ri 're wa'wa u, 'Re ãhãimana u'âsi mono, ãwa 're ãsãmra mono zéb u hã. Dawasété parizéb da, ma tô ta norĩ hã tãma ãma 're sõprub za'ra, 'Re ãhãimana u'âsi mono ma. Tane nherẽ, ma tô romhã na danhimizama hãiba hã da te 're zata pese za'ra, danhimizahãri sidãpãsi 'ri hã da te dasima 're ãsõré za'ra mono zém nhiti. 12 ãne wa, ma tô duré Zezusi hã 'ri 'wawi wa'razém nhiti dãrã, te te

ĩrobzépata za'ětē zarina, tiwapru na taha si te te oto 're da'a'upsōi mono da, dawasété hawi. ¹³ Taha wa, wa za oto wa norĩ hã Zezusihi u si dawĩ 're wawairébé, taha si tô sena te te 're wa'anho'reptui mono da. Taha wa, wa za tô, 're ĩdanomro 'rata mono zé hã, wa te 're rēme pese za'ra. Zezusi hã wazada dâ'â wa, da te dasiwi ĩruiwapari ne, da te 're wa'ruiwapari za'ra mono da nherē, wa za tô ĩtēme 're wawairébé, 're ĩwanomro 'rata mono zém hawi, Zezusihi u hã. ¹⁴ Āme ti'ai āma 'ri nho'u hã 're ĩ'maihâimana u'âsi mono hã wama 're 'maihâimana mono õ di, āma 're ĩwahâimana u'âsi za'ra mono zéb da hã. Robaba uptabi di. Hâiwa āma 'ri nho'õmo zô si, wa za wasima 're wanhopré u'âsi, za tame wama 're ĩhâimana u'âsi za'ra mono zô si. ¹⁵ Taha wa, Zezusi hã wazada ĩdâ'ázéb zarina, wa za 'Re ĩhâimana u'âsi mono āma 're wawata u'âsi za'ra, taha si wama 're toi u'âsi za'ra mono da. Duréihã danhimizama na duré dasa na 'Re ĩhâimana u'âsi mono ma, 're danhoprub za'ra mono wa, dama 're ĩtoi mono ne, wa za āma 're wawata u'âsi za'ra, wama 're toi u'âsi mono da. 'Re ĩhâimana u'âsi mono hã wa te wasina 're ĩ'umnhasi za'ra mono zém na sō'awi dama 're ĩwasiwasu'u za'ra mono na zama, wa za tãma āma 're wanhoprub za'ra, 'Re ĩhâimana u'âsi mono ma hã. ¹⁶ Marĩ ĩwē hã 're 'manharĩ za'ra wa'aba mono da dama, duré 're ĩdapawaptob za'ra wa'aba mono zém na hã, āma 're aipo're simrami za'ra wa'aba mono õ di za. Taha na zama te duré tãma 're asõprub za'ra wa'aba mo, taha na aima 're toi u'âsi za'ra wa'aba mono wa, 'Re ĩhâimana u'âsi mono hã.

¹⁷ Asiré ĩsazei'wa 'madâ'â'wa norĩ nhimiroti hã te za 're ĩwapari pese za'ra wa'aba mo. Te te aima 're ĩroti za'ra wa'aba mono zéb zarina, te za marĩ hã 're ĩ'manharĩ za'ra wa'aba mo. Ta norĩ hã niwapsi te za 'Re ĩhâimana u'âsi mono ma siwasu'u za'ra, te te ai'āma 're ĩromhuri za'ra wa'aba mono zém na hã. Taha wa, te ta norĩ hã ai'āma 're hâtâ'â u'âsi za'ra wa'wa, te te 're ĩ'ai'madâ'â za'ra wa'aba mono zém na hã, Cristuhu zazei'wa 're ĩhâimana za'ra mono zém na si 're anomro aba mono da. Ta norĩ nhimiroti hã 're wapari pese za'ra wa'aba mono wamhã, to sina te za tô ta norĩ hã te te ai'āma 're romhuri za'ra wa'wa. Tane nherē, 're wapari za'ra wa'aba mono õ wamhã, robzei āna te za te te 're romhuri za'ra. Āne wamhã, te te 're aipawapto waihu'u za'ra wa'aba mono õ di za, ta norĩ hã.

¹⁸ Ma'āpé, wa'āma 're aimreme zusi u'âsi aba mono za, 'Re ĩhâimana u'âsi mono ma. 'Re ĩwanomro wē mono da si, wa tô wa norĩ hã wa te wasima 're wē u'âsi za'ra. Taha wa, marĩ na 're ĩwahâimana wasété za'ra mono zém na hã 'râwi wapēē na 're wasisāmri za'ra mono õ di oto, wama 're hâimana za'ra mono õ wa. ¹⁹ Taha wa, wa duré wa hã ĩsima aiwē uptabi za'ra wa'wa, ĩ'āma

zama 're aimreme zusi aba mono da, 'Re ìhâimana u'âsi mono hã te te ãma ìzatõrĩ su'u da, atẽme za'ra wa'aba, te asabu za'ra wa'aba hã.

20-21 Wanhib'apito Zezusi hã wazada ìdâ'âzéb zarina, te oto pone'ërebâ 'madâ'â'wa ne, wama 're hâimana za'ra, wa'madâ'â'wa ìwẽ uptabi na hã. Wazada ìdâ'âzéb zarina, ma tô 'Re ìhâimana u'âsi mono hã taha na dama ropisutu té, ãma 're dahâimana u'âsi za'ra mono da oto, taha ãma si. Zezusi hã dâ'â nherẽ, ma tô Ìmama hã apâ hâiwa'utu.

'Re ìhâimana u'âsi mono hã dama rowẽ pisutu'wa hã, ìwẽ si te te aima 're sômri za'ra wa'aba mono da, wa taha na si te ai'ãma 're umnhasi za'ra wa'wa, taha zarina uburé marĩ hã te te aima 're ìwẽ za'ra wa'aba mono zéb zarina si, tãma ãma asina 're uwaimrami za'ra wa'aba mono da. Duré Zezu Cristuhu waihu'u pese na te te 're wa'apawapto mono da, wa duré taha na si te ai'ãma 're umnhasi za'ra wa'wa, ìwẽ si wa te oto tãma 're 'manharĩ za'ra mono wa, wa'ãma 're toi u'âsi mono da, 'Re ìhâimana u'âsi mono hã.

Taha wa, Zezu Cristuhu ãma si ãma 're wawata u'âsi za'ra wa'aba mono za. Tane tô.

Rowasu'u 'rãsutuzé wasu'u

22 Ìsisãnawã norĩ, ã te aima ãma ìroti za'ra wa'aba zém na, ma'ãpé aiwaimri ãma rosa'rata pese za'ra wa'aba za. Taha da, wa tô ìmreme 'rutu na ãma aima rowasu'u za'ra wa'wa, ã ìnhimi'ui'ére na hã. 23 Wasisãnawã Timotiu hã ma tô dazazém hawi watobro, da te tãma ìrob'ruzéb zarina. ãne hã waihu'u za'ra wa'aba da, wa tô ìsima aiwẽ za'ra wa'wa. Tawamhã, ta hã we ìtẽme wisi su'u wamhã, ãme ìnhamra ré, te te ìnhiza wamhã, te za ãma ìsiré mo, atẽme za'ra wa'aba, taha zama te te duré asabu za'ra wa'aba da, ìsiré.

24 Ma'ãpé uburé ai'madâ'â za'ra wa'aba 'wa norĩ hã wama sawi za'ra wa'aba za. Uburé 'Re ìhâimana u'âsi mono nhib'a'uwẽ, tame 're ìhâimana za'ra mono norĩ zama, wama sawi za'ra wa'aba za duré.

Itaria na danhipti'a nho'õmo nhisi hawi 're ìwairébé mono norĩ zama te ãma asawi za'ra wa'wa duré, ìsazei'wa norĩ, siré 're ìsi'ubumroi mono norĩ hã.

25 'Re ìhâimana u'âsi mono ma, wa ai'ãma 're ìmreme u'âsi za'ra wa'wa, ìsimizawizé hã aima 're hâimana u'âsi za'ra wa'aba mono da.